


羅江縣志



地 280.1091  
35

部三=122



四  
羅  
江  
志

羅江縣志序

羅江縣舊無志乾隆九年邑令秀水沈公潛延余先君石亭公纂修時兵燹初定並無書籍可考又急於卒役不及細訪前代名家著述今百餘年來

本朝文教光昌大開四庫全書重修永樂大典於是乎內府秘藏幾乎家有其書矣此縣志之所宜亟亟也調元自歸田以來杜門讀書念日月之已逝恐文獻之無徵若不繼前志而補前缺恐一旦填溝壑咎將誰歸爰取先君所纂舊志遍加考訂又復於登山臨水之餘坐小輿攜胥史由本州五邑山巔水涯凡有半

羅江縣志

卷一序

一

碣殘碑自明以上者莫不手自摹搨家故有萬卷樓又復獮祭漁獵夜以繼日互相校讐並取州邑舊治去其無徵摘其可據歷三寒暑以成此書其每條俱載原書之名用朱竹垞日下舊聞例也其所採金石文俱照式繪圖於旁其門則分沿革城池縣署各官各署城內東鄉南鄉西鄉北鄉人物節孝道釋技術土產共十五門獨不編藝文一門俱附見於各勝古蹟之後以便查閱皆低一格其拙作詩文亦間錄於後至調元偶有考證則低二格附抄焉共十卷此書原各梓里舊聞因裁縣改州不言縣志今因復設羅

江故仍曰縣志其但言稿而不言撰者蓋欲俟諸賢  
大夫他日纂修古綿總志以備芻蕘之一採也嘉慶  
七年九月重陽前一日甬村老人李調元時年七十

羅江縣志卷一

邑人李調元雨村稿

沿革

羅江縣禹貢梁州之域秦豳分野秦屬蜀郡漢涪縣地  
晉末置萬安縣屬梓潼郡宋齊因之梁末移治潺亭改  
曰潺亭縣西魏復曰萬安置萬安郡隋開皇二年郡廢縣屬  
綿州唐因之天寶元年改曰羅江宋元明仍舊編戶三里  
清類天文分野之書

晉綿州歌豆子山打瓦鼓陽平關撒白雨白雨下娶龍  
女織得絹二丈五一半屬羅江一半屬元武晉詩

羅江縣志卷一

按明曹學佺各勝志羅江兩水相感成羅紋因以  
為名及考宋地輿廣記則疑羅江即潺亭又云有  
羅瓊化江因以為名迄無定論今按晉詩一半屬  
羅江則江名羅江早見于晉不始于唐矣或者江  
先名羅然後各縣歟

羅江縣綿州西南七十八里舊二十鄉今十鄉本涪縣  
地晉于梓潼水尾萬安故城置萬安郡隋廢屬綿唐改  
羅江縣太平寰宇記

緊羅江州南七十里一十鄉黃鹿金山石凍三鎮有金  
山羅江湔水元豐九域志

按唐改羅江縣亦設羅江驛見唐唐彥謙羅江驛  
詩云數枝高柳帶鳴鴉一樹山榴自落花已是向  
來多淚眼短亭回首在天涯 全唐詩

### 城池

羅江舊無城明成化初知縣盛景築土城正德中僉事  
郝綰督知縣陳堯臣包砌以石高一丈五尺周四里三  
分計七百七十四丈門四萬歷中知縣丁澤繼修後毀  
于寇 國朝順治初知縣陳鎬羅綸重修十六年併入  
德陽雍正七年復設 大清會典 十三年知縣王榮命捐修東  
西二門乾隆三十二年知縣楊周冕重建估修 舊縣志

### 羅江縣志

#### 卷一

二

### 縣署

羅江縣治明成化中建本朝雍正八年知縣王榮命重  
修直隸綿州州治於康熙三十一年涪江水溢滄州城  
東北之半乾隆三十二年涪水復溢城壞于水者十之  
七三十四年川督阿爾泰因裁州屬之羅江縣徙州治  
焉領縣分四德陽安縣綿竹梓潼而改舊州爲金山驛  
嘉慶七年六月勒公保奏該州仍回舊州復設羅江縣  
治

### 羅江縣署前石屏銘

萬歷三十年壬寅歲仲春之吉知羅江縣事直隸龍

舒少岡姚謨捐俸勸石屏於公署之前落成乃題其  
銘於屏上爲石屏銘雖所以自警亦所以告後之丞  
是邑者銘曰民爲邦本本固邦寧設守保障有如斯  
屏捍災禦患衛國蔽民王家柱石蒼靈鉅鎮維茲屏  
立欣慕聖訓君子學道則能愛人厥道維何禮樂教  
行禮以飭躬樂以養情慈祥豈弟卓哉著明隨在皆  
學隨在皆政冰淵其事金石其心百爾財用膏脂相  
憐民吾赤子無告尤兢政多撫字刑戒濫淫鋤強植  
弱革弊親仁鑒茲前屏用儆官箴見道于屏作我法  
程絃歌遺範敢步芳聲後有君子三復屏銘

羅江縣志

卷一

三

俸廉

羅江係首衝知縣養廉九百兩俸銀四十五兩本縣驛  
馬三十疋歲支草料棚槽例斃銀八兩

倉庫

常平倉向無積貯添採買四千石鹽稅銀二百一十二  
兩一錢七分三釐六毫茶課稅銀二兩五錢

糧銀

新舊承糧花戶陳世英等一千一百六十六戶糧銀三  
千八百二十兩三錢四分

以上俱大清會典

名宦

唐何易于明盛景二人有傳

唐知縣何易于傳易于嘗爲益昌令縣距刺史治所四十里城嘉陵河南刺史崔朴嘗乘春自上游多從賓客歌酒泛舟東下直出益昌旁至則索民挽舟易于卽腰笏上下刺史驚問狀易于曰方春百姓不耕卽蠶隙不可奪易于爲屬令當其無事可以充役刺史與賓客跳出舟偕騎還去益昌民多卽山樹茶利私自入會鹽鐵官奏重摧筦詔下所在不得爲百姓匿易于視詔曰益昌不征茶百姓尙不可活矧厚其賦以毒民乎命吏刻去吏爭曰天子詔所在不得爲百姓匿今刻去罪愈重吏止死明府公一有寧字免竄海裔耶易于曰吾寧愛一身

羅江縣志

卷一

四

以毒一邑民乎亦不使罪蔓爾曹卽自縱火焚之觀察

文粹使聞其狀以易于挺身爲民卒不加劾邑民死喪

子弱業破不能具葬者易于輒出俸錢使吏爲辦百姓

入常賦有垂白僂杖者易于心召集一本下有與字食問政得

失庭有競民易于皆文粹親自與語爲指白枉直罪小

者勸大者杖悉立遣之不以付吏治益昌三年獄無繫

民民不知役改綿州羅江令其治視益昌是時相國裴

公刺史休出鎮綿州獨能嘉易于治嘗從觀其政導從

不過三人其全一作易于廉約如是

孫樵曰會昌五年樵過一作道出益昌有能言易于治



狀者且曰天子設上下考以勉吏而易于考止中上  
何哉樵曰易于督賦如何曰上一作請常亦作緊期  
不欲緊一作堅繩百姓使賤賦二作出粟帛督役如何曰  
度支費不足遂出俸錢冀優貧民饋給往來權勢如  
何曰傳符外一無所與擒盜如何曰無盜樵曰予居  
長安歲一作年聞給事中校考則曰某人為某縣得上  
上下下考由考一作某人得某官問其政則曰某人能  
督賦先期而畢某人能督役省度支費某人當道能  
得往來達官為好言能擒若干盜反若干盜一無上四字  
縣令得上下考者如此邑民不對笑去樵以為當世

羅江縣志卷一

五

一下有在字上位者皆知求才一作財字為切至如緩急補吏  
則曰吾患無以共治膺命舉賢則曰吾患無以塞詔  
及其有之知者何人哉繼而言之使何易于不有得  
於生必有得於死者有史官在經緯集

知縣二白大信永徽五年任引射水灌田知縣三韋德貞元二十一年任引

折脚水灌田

宋知縣一陳覃奉旨以兵馬監押知縣事見茅亭客話

知縣二宋嘉彥嘉祐三年署羅江縣事詳見潺亭廟碑

記

明知縣盛景傳景字允高吳江人景泰二年進士即授

御史至通州會都御史王翺召人與同宿察院景不爲之下翔使人出外景遽鑰其門不得入翔慊之景帝時以災異求言諸御史以奏稿示之景曰老生常談耳我當爲之時上頗事游宴景族父叔以御醫出入禁中知其事家燕言及之景卽以入疏如造龍船撒銀豆者數事疏入久不報一日有旨召都御史蕭鎡至左順門太監舒良王誠皆盛怒曰上欲取汝首鎡曰某何罪而至此良曰汝教御史妄言鎡曰御史以言爲職不關白其長令鎡有過御史猶將劾之鎡能禁之邪取首之言果出於上乎不然是太監僞傳詔旨也且禁門何地太監

羅江縣志

卷一

六

乃背闕而坐吾且以聞二人愕然乃好謝之鎡出召景問禁中事密汝何自知之曰聞之族叔叔大懼欲死而景自如曰必不至死重則戍邊耳其疏竟畱中察山東政以災傷上疏乞蠲民所負孳息巡按廣瀧水賊起景單騎諭降之劾巡撫侍郎揭稽不法稽坐左遷見震澤紀聞六年七月以時多災異偕同官倪敬等上言府庫之財不宜無故而予遊觀之事不宜非時而行曩以齋僧屢出帑金易米不知櫛風沐雨之邊卒趨事急公之貧民又何以濟之近聞造龍舟作燕室營繕日增嬉遊不少非所養聖躬也章綸鍾同直言見忤幽錮逾年并所以

昭聖德也願罷桑門之供輟宴佚之娛止興作之役寬直臣之囚帝得疏不憚下之禮部部臣稱其忠愛帝報聞然意終不憚未幾詔都御史蕭維禎會同冢宰王翱考察其屬諭令去之御史罷黜者十六人而敬景與焉皆謫爲典史以景浮躁改廣西古田典史景雋爽負氣見明史倪敬其去蓋猶以翱故也辭院長咸惜之景曰此于景雖怒尙存一史字也嘗賦詩曰縣門如水倚崢嶸租稅無多訟亦清有酒可斟詩可詠也無官長要逢迎天順改元調羅江知縣所至皆有山水之勝韓都承熙謂王曰九臯不知人要安排足下宜置諸車馬轡轡

羅江縣志

卷一

七

之地乃置諸山水間耶景答以詩曰才劣豈宜居要地性慵只合對青山銓曹自有知人鑒一度移官一度間

見莫氏語林

初量移四川羅江令都御史曹泰甚禮重之時

四川盜起泰因入朝求去位景上疏言致盜由泰乃委之而去可乎泰至吏部時翱爲尙書問蜀中官吏之賢者泰首舉景翱笑曰彼言公短而公乃稱其長可謂無私矣見震澤紀聞時羅江縣歲早教民鑿池一千二百五十餘所遂爲永利德陽寇趙鐸僭稱趙王流劫郡縣景伏奇兵遮擊大敗之邑以完民爲立生祠於羅真觀擢叙州府戎人珙筠高土狃叛朝廷遣將討之前軍遇賊稍

却景在後笑之矢着兩耳戰益力賊驚亂官兵乘之遂大克以耳創甚致仕後追理前勞遣使賚金幣寶鈔賜于家景孝友自叙州還置第郡城呼兄弟共居之又迎養姑姊之無衣者至今鄉族猶稱之云

見蕪州府志

羅江縣公署後有土地祠前令所在頗著靈異令有事必禱焉祭享無虛日自景蒞任不復然一日私廨失所畜雞尋之乃在神前舒翼伏地如被釘者以問輿皂輩皆言神以久不祭故見譴耳景怒至神祠斥數其神因舉意欲毀之是夜夢中見神來謝罪懇曰余血食於此者累年不敢為過昨日雞被釘乃鬼卒輩苦飢故為之

羅江縣志

卷一

八

非余敢然也公幸憐之勿毀景不許明旦遂撤之其前令者既秩滿即留家于縣署後夜夢神來訴乞立廟詰之曰何不更訴新令神盛額曰須公自為之耳彼盛公嚴威不敢干也令乃即所居旁建祠祀之

堯山堂外紀

接近時秀水盛百二袖堂筆談云家御史羅江署後廟神事又見李漁村良齋筆記自非虛言以是觀之邪不勝正自古然矣惟自顧此心有一毫打不過在先自餒矣君子所以貴集義也

知縣

二汪顯

成化十三年任見馬馳寺藏身碑記

知縣

三陳堯臣

正德年間

任見四

知縣

四張綸

興平人知羅江有爭田久不決者鞠之得其情帖然平服

川通志

知縣 五 鍾嘉福 江西人見通志 知縣 六 丁澤 萬歷年

本朝知縣 一 毛相 順治八年任 知縣 二 陳鎬 順治十年任

知縣 三 羅綸 同時署

順治十六年羅江併入德陽改縣為驛

雍正七年復設羅江縣

復設知縣 一 王榮命 直隸舉人雍正八年任 知縣 二 李德瀚 山西

歲貢乾隆初年任 知縣 三 田朝鼎 石門人乾隆四年八月任 知縣 四 王

嘉會 江南上元人乾隆七年任 知縣 五 沈潛 浙江秀水人字亦昭

乾隆九年任延石亭公纂修羅江志平白馬關路教民

耕織先是羅民不知蠶事資州知州張文嵐輯有農書

羅江縣志 卷一 九

一卷奉布政刊行並附以蠶桑說詳明樹桑育蠶之法

並造蠶筐架頒於民間民甚賴之在任三年卒民為塑

像於城隍廟左廡至今祀之 知縣 六 孫法祖 字克家漢軍舉

人乾隆十五年任 知縣 七 葉鑒 崑山人戊辰進士乾隆十七年任 知縣 九 楊周冕 雲南黔

任修文峯南塔 知縣 八 謝自泌 雄縣舉人乾隆十八年任 知縣 九 楊周冕 雲南黔

蒼舉人乾隆三十年任善集黃華書修雙江書院及奎

星閣羅自順治庚子科余昌宗登榜後中者寥寥至是

蟬聯登科甲者接踵焉

乾隆三十四年裁羅江縣知縣以綿州移駐

知州 一 黃叔顯 廣東連平州進士由翰林院庶吉士歷陞綿州知州乾隆二十五年到任以論

案掛誤歸  
至夔州卒

知州二博 純 滿洲人乾隆三十九年任

知州三張官五 浙江蕭山人由監生捐職乾隆四十八年任陞長沙府知府未幾獲罪去

知州四嚴作明 浙江餘姚吏員乾隆五十二年署

知州五沈念茲 字謹菴浙江歸安人由汶川令陞題綿

隆五十四年回任

現陞龍安府知府

知州六陸鼎 錢塘監生乾隆五十六年署任未幾卒

知州七潘邦和 字初菴吳縣人由監生歷任富順縣

知州八王鳳儀 字雲浦廬陵人進上乾隆六十年陞雅州府建昌道署任

知州九劉印全字慕陔江南武進人乾隆壬辰進士由

羅江縣志

卷一

資陽令陞合州駐藏三年復陞綿州嘉慶初年到任絕

苞苴嚴盜賊五年庚申正月十五日教匪偷渡嘉陵江

將逼涪城公即日自捐一千金米五百石身先士卒日

夜捨築石城堵禦其難民入城避賊及渡江得活者不

下萬人俱呼劉青天各各踴躍情愿捐資眾修絲毫不

累帑項公又前後自捐及民捐幾及萬兩俱用大方石

砌城賊去來兩次俱不敢逼城遂保全皆劉公力也于

是州民詳請勒公保奏請正印回綿嘉慶七年六月奏

准部文始到各官俱各回舊任先是署羅江陳公到任

然後劉公到州任其政蹟詳見予捐修綿州城碑記

嘉慶七年六月復設羅江縣知縣

復設知縣一陳啓泰字柘林浙江會稽人嘉慶元年冬由渠縣典史堵禦教匪勦賊有功奉 旨以知縣用七年綿州移回舊地復設縣治於六月初十日署任

廳署

典史署舊驛丞所居今移治北街西

宋縣尉鄒崇讓

見茅亭客話

明典史羅

勝

與知縣盛景同時見馬馳寺藏身碑記

本朝典史俸銀三十一兩五錢二分養廉八十兩

大清會典

典史一劉定旌德人乾隆十年任

見舊縣志

二張朝

羅江縣志

卷一

士

職三沈文玉以下俟查明再補

嘉慶七年六月復設羅江典史

復設羅江縣典史陳鑑湖北黃州府人嘉慶七年七月到任

學署

文廟在東大街春秋二祭

羅江縣學治東宋熙寧二年建明成化六年遷至今所宏治二年增修正德三年知縣盛景重修十二年知縣羅綸繼修署印都事張道振有遷建學宮詳文及司訓吳可美遷建儒學碑文

明吳可美遷建儒學碑文謹按本縣儒學墟於元末兵燹至洪武十六年縣令仍舊址剏建三十二年葺新皆坐北向南成化元年知縣盛景改而東向十八年縣官汪暵教官徐浩議遷於西南隅去縣治五十步近市狹隘□□科第寥寂□□□諸生欲易□□□堪輿指吉於城東因與生員吳國綱易地焉謀遷□於萬歷三十一年秋暫移二齋爲文廟明倫堂以定吉壤此不過築室道傍之短策三十二年八月十九日署印都司都事張諱道振來縣目擊荒蕪不堪從祀慨然議申且捐俸倡首捐貺成終二三士夫稍

羅江縣志

卷一

三

稍助工十之一二且羅民向坐貧瘠無能輸財祇效力協□□黨之中庶民歡樂子來不事催督於此可見人心之至順至靈用是不兩月而隆厦輪奐廟貌重光吁亦神哉第署縣鼎建之力督官鳩聚之能昭昭在人耳目者永不磨滅爾多士其所以奮跡聯鑣步武前芳者恐又不必崑特學址之吉蚤暮磨勵以無負提調汪公厚意深有望也尙慎旃哉余愧不能文姑紀其時日以俟後之君子叙其詳云萬歷甲辰孟冬

按此碑今在鄴都廟應移于學宮內



明余學宮

明楊慎送余學宮歸羅江豆子山打瓦鼓陽坪關散  
白雨白雨下聚龍女織得絹二丈五一半屬羅江一  
半屬立武我誦綿州歌思鄉心獨苦送君歸羅江浦  
升菴集

本朝羅江縣學訓導俸銀四十兩

大清會典

縣學額本六名乾隆三十五年羅江縣裁併綿州今嘉  
慶七年復設羅江縣其學額尙未定劉州尊印全以羅  
江文風爲五邑冠懇請上憲加額二名定爲八名尙未  
奉有明文

羅江縣志

卷一

三

訓導韓文範乾隆十年任見舊縣志其杜慶乾等皆改  
州之訓導俟查明再補

嘉慶七年七月復設羅江縣訓導

復設羅江縣訓導李肯堂眉州歲貢嘉慶七年七月任  
李化楠明倫堂碑記事之亡其實而僅附其名者  
之可也而事之著其名而並存其實者廢之不可也若  
明倫堂之建非所謂著其名而並存其實而有其舉  
之莫敢或廢者哉粵稽三代造士之法至詳且備而  
其設教之地於國則曰學於鄉則曰校庠序而又有  
小胥大胥小樂正大樂正司徒司馬之官以因時而

簡教之以故士之沐浴詠歌者皆曉然於人綱人紀之重而飭典敦倫期無負選造之至意孟子曰人倫明於上小民親於下不信然哉此明倫堂之所自助也 國家建立學校董以師儒其造士之法直可比隆三代而又屢頒 聖訓諄諄以孝弟爲先無非欲多士之爭自濯磨以共勉於人倫中也第羅邑係新分之縣學宮雖建而明倫一堂實闕不惟司訓者無以進多士而講業而士之人賢序者亦將無由顧名而思義曩雖有鼎新之志而寢以不果蓋築室道謀者十餘稔矣幸乾隆乙丑仲夏旌陽闈明府來治吾

羅江縣志

卷一

十四

羅下車之始目擊學宮曠缺慨然議新之首捐二十金爲士夫倡而司鐸韓君亦量解清橐身率諸生繼其後兩閱月而堂成伐石爲余記其始末余惟斯堂之廢不知幾何年今一念經營而成也忽焉非留心學校雅意作人以振興斯文爲己任者烏能有此繼自今羅人士執經問業博習親師不患無地而登斯堂者目擊道存亦將默動其慈孝友恭之念而不容自己韓子云行之乎仁義之途游之乎詩書之源無迷其途無絕其源於是乎在矣然則斯堂之建豈徒以其名哉

紋江書院

今改雙江

在治南乾隆三十一年知縣楊周冕建

李化楠紋江書院田房記世之學者莫不由教入願教之於塾與教之於城異教之於塾則人自爲師耳目不廣教之於城則人共爲師見聞日開古人推黨庠州序之遺意合一邑秀民而納之書院者良有由也顧地必爽塏堂必宏敬師必名宿脯必豐厚諸生膏火必以時均給官師考課必以時獎賞然後可羅江雖蕞爾邑有明三百年來名賢輩出厥後罹流寇之禍民若晨星文亦天喪吾羅遂以委頓幸奉 聖朝撫綏招徠休養生息百餘年間元氣漸復然而書

羅江縣志

卷一

五

院之設前此未嘗議及也滇南楊公來治茲邑爲政精敏而仁恕決獄不事敲朴聽訟務得其情逾年而境內又安於是以其公餘銳意建修書院以廣教澤召諸生而與之謀僉曰唯唯時余適以憂歸里公命偕諸君董其事余以羅故有奎星閣在城南今書院旣設閣宜並舉匪但培補風水之云亦取朱衣文明之兆公曰然是予之風心也議旣定一切相度地形規畫可否公爲之主余與二三友人贊襄其後甫期年大工告竣都人士及鄰境之秀者喁喁向風公之功偉矣抑不知吾羅之感公戴沐膏澤而咏勤苦者

宜何如之浴嗟太息而不忍置也奎閣計三層上塑奎星及文昌像書院凡四進大門三間二門一間廳三間講堂五間耳房八間房四間亭子一座池一口用示壯觀至書院田舊在東村廣興寺者計七十五畝八分九釐一毫地四十五畝五分一釐一毫每年收租穀市斗五十七石近從吳家菴撥入者計田二十五畝二分二釐五毫每年收租穀市斗一十六石畧村河灘地一十九畝零八釐九毫每年收租銀六兩北關外新懇田一畝八分每年收租穀市斗一石六斗公重其事以屬縣尉張君履勘丈量給形定界

羅江縣志

卷一

去

另立紋江書院册名歲輸糧銀二兩九錢一分零四毫佃房代納街房門面九間縣署前七間歲收租銀四十六兩二錢書院大門旁二間歲收租銀九兩二錢外有各寺捐銀二百兩交與值年會首生息以濟膏火用垂永久是役也前署縣尉張君朝職沈君文玉及署儒學訓導王君名佐皆與有勞例得備書云奎星閣在南街前令楊周長建

駐防

駐防署在西街南向

羅江縣志卷二

邑人李調元雨村稿

城內

城隍廟治東大街明吳瑛有記

明吳瑛羅江縣重修城隍廟碑記京師郡邑之有城隍猶夫天下之有民牧守令也位次之崇卑享祀之隆殺亦各隨其所在以爲資級其名號則均曰城隍焉夫城者雉堞之目隍者陂池之名凡國於天地間其所恃以保障者籍此焉耳易曰城復於隍勿用師傳曰高城深池徧天下夫險者夷則師不利夷者險

羅江縣志卷二

一

則大勢張故累石爲城而不厭其高穿塹爲隍而不厭其深蓋不如是不足以語城隍云爾假神以是名蓋取其陰佑下民之義也詩曰佻人維藩大師爲垣大邦爲屏大宗爲翰懷德維寧宗子維城但凡著屏蔽之功扞禦之績者咸可稱是名號以申伯之賢而謂其良翰世勛之畧而目其長城况大神也者扞大災禦大患以陰佑下民爲職者固宜其稱謂若是也以故取義於彼襲號於此春秋則禮祭於壇災異則祈禳於祠巍然以峙其宮煥然以華其宇使人瞻拜之際洋洋乎如在其上如在其左右也故不得以京

師卑其禮亦不以郡邑寢其制無非安其神棲止法  
庭以光其陰佑之職而已羅江城隍廟在縣東三百  
步許經時既久材多毀折且其基隘狹四週民居艱  
於開拓故耳正德庚辰冬丁侯澤以舉人來治是邑  
相其廟將改爲之會百弊煩冗不果歷甲申歲物豐  
民和樂政治畢舉乃料物材乃市隙地乃徵工匠乃  
課章程朝督夕牘完舊益新鼎建拜廳一神寢一門  
房一廟廡二垣築百堵松栢雜植鎧杖儀物黜聖丹  
漆偕作踰冬成然後神得所棲而一時之奇觀奪目  
於是諸老先生有言者曰神不歆非類人不祀非族

羅江縣志

卷二

故神之於人也觀其德政而均布福人之於神也因  
其職分而享祀行丁侯知羅江齋明正直精潔惠和  
其德足以昭其馨香其仁足以和其民人苟無祠之  
修焉其精白以承休德者猶將感格於冥漠茲復祇  
載益虔祠廟重新則禮夫神者何如也吾聞之惟德  
爲能感神惟神扶于有德繼今以後寧不有以啓侯  
之衷相侯之治以顯其陰佑之靈者耶衆皆曰諾請  
記之以徵厥後也余故首著城隍之說載諸先生之  
言如此云大明嘉靖甲申孟夏十五日立教諭滇南  
沈森書丹訓導鶴慶陸雲遠篆額德陽張木正刻字

城隍廟左側有明刻祈雨止雨碑明萬歷十五年巡撫徐頒行知縣吳德元立石

四川等處承宣布政使司為督撫地方事奉欽差提督軍務巡撫四方等處地方兵部右侍郎兼都察院右僉都御史徐憲稟照得本部院巡撫川南地方自擊天時亢旱雨澤愆期致妨農務已經案行司道州牧縣令虔誠祈禱去後今照本部院存有春秋繁露一冊向在京師行之輒驗合行發司刊發為此稟仰布政司官吏即將發去前書令人謄寫作速刊書書

羅江縣志卷二

冊通發各該官司如法虔誠祈禱務要挽回天意使甘霖早沛以便各處農民播種施行奉此刊刻遍發須至書冊者一春求雨法正月二月三月一先於甲乙日為大蒼龍一條長八丈今官尺六寸二分合古周尺一尺居中央又為小蒼龍七條各長四丈於東方皆東向其間相去各八尺以竹織成龍形取吉土填實其中用青紙糊之髻角耳目爪牙俱全用墨畫鱗蓋製完待臨時用一每月於初八十八二十八口於郡邑東門之外為四通之壇方八尺稍高於地即止植蒼繪八繪帛也蒼青色以蒼繪為五方旂樹之於壇旁開池方八深一尺池中

貯水水中錯置活蝦蟆五枚一於壇中設立共工神

位備生魚八尾元酒八大鐘淡酒也清酒八大鐘美酒也

膊八盤脯也脯八盤乾肉也以祭之於道士端公人

役之中擇精潔有體氣滯疾者不用辯口利詞者以祝祝祀齋

三日臨時穿青衣先再拜乃起而祝曰昊天生五穀

以養人今五穀病旱恐不成敬進清酒膊脯再拜請

雨雨幸大澍所選少童八人即稚童也皆令先齋三日齋

者不食葷腥不飲酒不食五辛晝夜宿於壇中穿青

衣而舞之田畷夫即里老務農鄉民也亦令先齋三日齋如穿

青而立之又於壇中聚小腳蛇一名蠓蠓一名蠃蛇生山內澤

羅江縣志 卷二

中祈禱時多聚此蛇置貯水大缸中折柳枝泛其上

晒於日中得雨即送還本山又一法取蜥蜴十數條

置水瓮中令童男女折柳枝祝曰蜥蜴蜥蜴興雲吐

霧天下大雨放汝歸去一祈雨之人或端公道士但

能事神者集於壇上依科行禱日色雖熾不許張蓋

一既立壇便將南門闔閉斷人行走置水缸中於門

外一選頗曉經義道士十數人將木郎神咒誦熟繞

壇念之一每過三日不雨具生魚八尾元酒大鐘清

酒八大鐘膊脯各八盤祀齋三日前人穿青衣先再

拜乃跪而陳設祭品於壇上復再拜乃起祝曰昊天



生五穀以養人今五穀病旱恐不成敢進清酒膊脯  
再拜請雨雨幸大澍前選童子八人穿青衣而舞之  
齋夫穿青衣而立之又取三歲雄雞三歲豕猪即母猪也二隻  
用火燒其尾於四通神宇勿令死又具老母猪二隻  
一隻置於北門之外一置於市中令城中各更鋪置  
鼓一面聞壇中鼓聲即逐鋪傳入市中直至北門各  
用火燒猪尾一凡祈雨傳牌示諭城鎮鄉村居民一  
於皇歷中查水日各里立社焚香致禱社神一各家  
於大門外設香桌水一缸每日祀戶一禁諸人勿伐  
古木勿斬山林一里社之溝渠疏浚使與里外之溝

相通一於社中各鑿五池池中貯水水中置活蝦蟆  
每池各一枚一將無主屍骸併各家停放屍柩盡令  
掩埋一將山谷積水深處開浚疏通一將鯉魚或鱉  
以狗血塗抹投於深潭之底一道路橋梁有壅塞不  
行者淘決疏通一幸而得雨以猪一隻酒黍一卓不令  
豐盛也用白茅為席不得斬斷所以致潔此得雨之後  
酬神之禮也夏令四月五月一先於丙丁日為太赤  
龍一條長六丈居中央又為小赤龍六條各長三丈  
五尺尺如前式於南方皆南向其間相去各七尺以竹織  
成龍形取潔土填實其中以紅紙糊之髻角耳目爪

牙俱全用紅畫鱗遮蓋製完待臨時用一每月于初  
七十七二十七七日爲四通之壇於郡邑南門之外方  
一丈稍高於地卽止植赤繒七各長七尺赤紅於壇  
傍開池方七尺深一尺池中貯水水中置活蝦蟇五  
枚一於壇中設蚩尤神位備赤雄雞七隻元酒七大  
鐘清酒七大鐘膊七盤脯七盤解俱以祭之於道士  
端公人役之中擇精潔有體氣瘡疥者不用辯口利辭者以祝  
祝齋三日臨時穿紅衣先再拜乃跪陳設品於壇上  
陳訖復再拜乃起祝曰昊天云云四句畢所選壯者  
七人皆令先齋三日臨時穿紅衣而舞之司空官名  
如無

羅江縣志

卷二

六

以道官代之齋夫

解見前

亦令先齋三日

齋如前

臨時穿

紅衣而立之一既立壇便將南門闔閉斷人行走置  
水缸中於門外一選頗曉經義道士十餘人繞壇念  
木郎神咒一每過三日不用具雄雞七隻元酒七鐘  
清酒七鐘膊脯各七盤祀齋三日前穿衣再拜乃跪  
而陳祭品於壇上陳訖復再拜乃起祝曰昊天云云  
四句前選壯者七人穿紅衣而舞之司空齋夫穿紅  
衣而立之又取三歲雄雞母猪皆用火燒其尾令勿  
死凡祈雨傳牌示諭城鎮鄉村居民一凡遇水日城  
市鄉村人家各祀竈神一將井泉淘浚使深勿留污

濁一將杵日盡搬本家門外置之街路一將各里渠溝疏浚使與閭外相通一於社各鑿五池池中置水水中置活蝦蟆每池各一枚一禁各家勿得擅動土工違者四鄰舉首季夏求雨法一禱山林以助之山靈能興雲致雨當禱之以求助一令郡邑徙市於郡邑南門之外五日禁勿得行走入市一於戊巳日爲大黃龍一條長五丈居中央又爲小黃龍四條長一丈五尺以竹織成龍形取潔土填實其中用黃紙糊之髻角耳目瓜牙俱全用黃畫鱗遮蓋製完待臨時用聚巫卽祈雨道人從於市之旁爲之蓋以覆之爲四通

羅江縣志 卷二

七

之壇於中央植黃繪五

黃帛爲旂各長五尺樹之中央

於壇中設后

稷神位備母

音模

飽五盤元酒五鐘

淡酒也

清酒五鐘美酒

也膊五盤

膊脇也又豚肩

脯五盤

乾肉也

以祭之於道士端公

人役之中擇精潔

有骨氣瘡疥者不用

辯口利詞者以祝祝齋

三日臨時穿黃衣先再拜乃跪而陳設祭品於壇上

陳訖復再拜乃起而祝曰昊天云云

四句如前

畢所選丈

夫五人皆令先齋三日

齋者不食葷腥不吃五辛不飲酒

晝夜宿壇

中穿黃衣而舞之老者亦令先齋三日

齋如前

穿黃衣

而立之一旣建壇便將南門闔閉斷人行行走置水缸

於中門外一選頗曉經義道士十餘人繞壇念木郎

神咒一每過三日不用具母飽立盤元酒五鐘清酒  
五鐘膊脯各五盤祀前齋三日人穿黃衣先再拜乃  
跪而陳設祭品於壇上陳訖復再拜起祝曰昊天云  
云五句前選丈夫穿黃衣而舞之老者穿黃衣而立  
之又取三歲雄雞三歲母猪用火燒其尾於四通神  
宇勿令死一凡祈雨示諭城鎮鄉村居民一凡遇水  
口令城市鄉村人家各祀竈神一將井泉淘浚使深  
勿留污濁一將杵臼盡搬本家門外置之街路一將  
各該里社溝渠疏浚使與閭外之溝相通一於社中  
鑿五池池中貯水中置活蝦蟇各一枚一令各家祭

羅江縣志

卷二

八

中霽

中堂土祠

勿得擅動土工違者四鄰舉首究治一禁

男子勿得行走入市一幸而得雨以猪一隻酒黍一

卓

不令豐盛也

以白茅爲席不得斬斷以致潔此得雨後

謝神之禮也秋令七月八月九月一先於庚辛日爲

大白龍一條長九丈居中央又爲小白龍八條各長

四丈五尺

尺如前式

於西方皆西向其間相去各九尺以

竹織成龍形取潔土填實其中用白紙糊之髯角耳  
目爪牙俱全用粉畫鱗遮蓋製完待臨時用一每月  
于初九十九二十九日於郡邑西門之外爲四通之  
壇方九尺植白繒九以白繒爲旂各長九尺於壇旁

開池方尺深一尺池中注水水中置活蝦蟇五枚一  
於壇中設立太昊神位以桐木刻成木魚九尾元酒  
九大鐘清酒九大鐘膊脯各九盤解俱全前而祭之於道  
士端公人役之中擇精潔有體氣瘡疥者不用辯口利辭者以  
祝祝齋三日臨時穿白衣先再拜乃跪而陳設祭品  
于上陳訖復再拜乃起祝曰昊天云云五句祝畢前  
所選鰥者老而無妻者九人皆令先齋三日不食葷腥酒  
併五辛晝夜宿壇中穿白衣而舞之司馬官名如無以  
巡撫巡檢或營中軍官代之亦令先齋三日穿白衣  
而立之又祈雨之人或道士端公但能事神者集於

羅江縣志卷二

九

壇上依科祈禱日色雖熾不許張蓋一既立壇便將  
南門闔閉斷人行走置水缸於中門外一選頗曉經  
義道士十餘人將木郎神咒繞壇念之一過三日不  
雨具桐木魚九尾元酒九鐘清酒九鐘膊脯各九盤  
前人穿白衣先再拜乃跪而陳設祭品於壇止陳訖  
復再拜乃起祝曰昊天云云五句畢前選鰥者九人穿  
白衣而舞之代司馬者白衣而立之又取三歲雄雞  
三歲母猪皆用火燒其尾於四通神宇令勿死一凡  
祈雨傳牌示諭城鎮鄉村居民一禁民家不許焚燬  
山林不許銑冶不許將金銀銅鉄之物鎔化一令各

家每日設香案祀門一於社中各鑿五池池中貯水  
水中置活蝦蟆各一枚幸而得雨以猪一隻酒黍一  
棹不令豐盛也以白茅爲席不得斬斷以致潔此得雨後  
謝神之禮也冬令十月十一月十二月一先於壬癸  
日爲大黑龍一條長六丈居中央又爲小黑龍五條  
各長三丈如尺寸於北方背北向其間相去各六尺以  
竹織成龍形用黑紙糊之髯角耳目爪牙俱全用煤  
畫鱗遮蓋製完待臨時用一每月於初六十六二十  
六日於郡邑北門之外爲四通之壇方六尺植黑緡  
爲旂各長六尺樹於壇中開池方八尺深一尺池中

羅江縣志

卷二

十

注水水中置活蝦蟆五枚一於壇中設立元冥神位

備黑狗子六隻小乳狗也元酒六丈鐘清酒六大鐘鮮見前

膊脯各六盤鮮見前以祭之於道士端公人役之中擇

精潔有體氣滯亦者不用辯口利辭者以祝祝齋三日臨時穿

黑衣先再拜乃跪而陳設祭品於壇上陳訖復再拜

乃起祝曰昊天云云五句畢祝所選老者六人先齋三

日不食酒葷併五辛之物晝夜宿壇中穿黑衣而舞

之尉官名卽今之州縣佐二首領及巡捕之秀者亦令先齋三日穿黑衣

而立之一旣設壇便將南門闔閉斷人行走置水缸

中於門外一選頗曉經義道士將木郎神咒繞壇念

之一於壇中假物爲舞龍一條令不時而舞之欲其  
不蟄不乖不臥而興雲致雨也一於境內之各山祈  
禱欲求出雲助之一每過三日不雨具黑狗子六隻  
元酒六鐘清酒六鐘膊脯各六盤祀齋三日前人穿  
黑衣先再拜乃跪而陳設祭品於壇上陳訖復再拜  
乃起曰昊天云云五句畢前選老者六人皆穿黑衣而  
舞之尉亦穿黑衣而立之又取三歲公雞母猪皆用  
火燒其尾於四通神宇令勿死凡祈雨示諭城鎮鄉  
村居民一令各家祀井凡井涇則浚之溝塞則通之  
止雨法一四時雨大多郡縣出示令各居民於皇歷

羅江縣志

卷二

十一

申擇土日塞水道蓋井禁婦人不得行走入市一郡  
邑令人打掃社壇郡邑若知州知縣或同知縣丞吏  
與齋夫卽各鄉民三人以一人祝禱皆令先齋三日不食  
葷酒五辛之物晝夜宿於壇備羊一隻猪一口酒黍  
一棹擊鼓三日而祝先再拜乃跪而陳陳訖復再拜  
乃起曰天生五穀以養人今淫雨久雨也五穀不和敬  
進肥牲清酒以請社靈除民所苦毋使陰滅陽陰滅  
陽不順于天天之意當在于利人人願止雨敢告於  
鼓鼓而無歌至罷乃止一將里社用紅絲圍繞十週  
祝禱者穿紅衣頭戴紅巾以請於社神祝其罷雨一

皆於辛亥之日州縣之社若同知縣丞各主之社今  
嗇夫吏與里長里人至於社下日晡而罷晡申三日時也  
而止如未及三日天大時可必矣亦止之

按董子春秋繁露原文原本求雨第七十四原止  
雨第七十五原在十六卷中有明郎瑛註釋甚詳  
見七修類稿乃董子原文也蓋當時各省俱有頌  
行此特變其文以通俗爾

碑陰

白玉蟾註解木郎神咒乾晶瑤輝玉池東盟威聖者  
命青童擲大萬里坎震宮兩騎迅發來大濛木郎太

羅江縣志

卷二

三

乙三山雄霹靂破石泉源通坤震與戶皓靈翁猛馬  
圓張歛火衝流精鬱光奔祝融巨神泰華登雲中黑  
旛皂纛揚虛空掩雲蒸雨屯雲濃闕伯撼動崑崙峯  
幽靈翻海元冥同馮夷鼓舞長呼風蓬萊弱水興都  
功龍鷹捷疾常禦克朱髮巨翅雙目彤雷電吐毒驅  
五龍四溟黠隸羅陰容一聲四海改昏蒙雨陣所至  
川流洪金光沅精斬旱虹洞陽幽靈召靈窿玉雷浩  
師變崆峒虛皇太華掃妖熾羣梁元皇號前鋒祠泉  
恣蜃威天公歛火律令翻穹窿鞭擊妖魅驅蛇蟲勾  
婁吉利炎赫縱登僧澤願悉聽從織女四歌心公忠



扶我救旱助勛隆赤雜紫鵝飛無窮攝虐縛崇送北  
鄴勅紫虛元君降攝急急如火鈴太師律令皇明萬  
歷十五年歲次丁亥孟冬吉且有德者感召天和國  
無憂水旱然天時亢  
陽不能保其必無錄此以爲勤恤民隱之一助云  
春去太皞夏去祝融茲祈雨及不奉祀者以木生火  
夏則人令非所宜祀不如祀共工神  
能興雲致雨先賢所傳俱有深意

春秋繁露中有祈雨法貯水巨甕雜柳枝聚蜥蜴寢其  
上復以木固其泥封令十歲幼童環日夜鞭雨立至此  
宣城徐華陽尙書試于蜀中有驗人謂仲舒深于陰陽  
五行之說不誣矣湧幢小品

徐元泰字華陽宣城人嘉靖乙丑進士歷順天府尹時

羅江縣志

卷二

十三

蜀中楊柳塞賊黨擁衆入平齋堡大肆殺掠西川太震  
命元泰以副都御史巡撫四川泰至破砦三十五斬首  
二千餘級進壁河西賊乞降明年復逞悉討平之拓地  
九百餘里以功進兵部侍郎陞南京刑部尙書乞歸卒  
江南通志

北街有明石坊一書兄弟繼美四字爲吳瓊吳瑛立也  
關帝廟治西南三百步有前代敬一箴碑今毀

鄴都廟在大東街後明初所建卽所謂三遷文廟地也  
廟有明吳可美建學碑文詳見卷一碑尙未移先君石  
亭公由乾隆辛酉壬戌聯捷進士歸班候選爲張姓等

延請課徒廟中從者幾及百人先君攜予附課時予未及十歲頗能屬對一日客至見予手持蜘蛛網竿網蜻蜻客出對曰蜘蛛有網難羅雀卽應聲曰蚯蚓無鱗願學龍客大奇之曰此不凡子也言猶在耳今近七十一事無成頭顱如此不凡何在自歸田十八年每憶少時兒戲事自悔自慚深負期望載筆至此不禁淚泫泫也調元重過鄧都廟有感詩此是當年舊書塾童蒙于此課初爰晨興撥草尋蛇窟晌晚攀枝探鵲巢每以收威遭夏楚偏于覓句解推敲如今老矣全無用回憶趨庭淚欲拋

羅江縣志

卷二

十四

鄧都廟前有明御史廬雍羅江八景詩碑

羅江八景詩

泮林古桂

雙玉儒林秀靈根月窟分天香飄太遠多士共清芬

景樂梵鐘

蒼鯨何處吼紺宇翠微抄餘音渡空江下界知昏曉

天臺秀色

城南繡嶺橫嵐翠入江清晴旭霞光爛依稀是赤城

龍洞仙踪

真人上昇去古洞白雲間見說月明裡龍車自往還

馬馳靈井

大旱禱輒雨應知江海通此方常稔歲此井有神功  
大霍奇峯

靈表數峯青聞名知大霍神僧久化去石鉢水不涸

紋江夜月

波淨羅紋細偏宜夜月明應是江妃織不聞機杼鳴

潺水秋風

潺山有澄澤湛湛鑑毛髮特有微波動涼風起蘋末

四川巡按御史吳人盧雍題

正德十三年五月立石

羅江縣志

卷二

五

補刻

盧雍字師邵吳縣人正德辛未楊慎榜進士授御史武  
宗北狩督宣府建行宮甚急雍上疏請罷役已清戎畿  
內長寧伯橫斂繫民雍抗章請釋無辜而還其侵地河  
間旱奏請免賦減科謫盡出藏鏹貸民全活甚衆按四  
川首劾巡撫不法一方肅然妖人挾幻術惑衆立擒置  
法鑿治犍爲之墓願灘温江之三渡以便行舟擢提學  
副使未任卒雍性嗜學能詩爲李東陽所賞尤喜表章  
先賢嘗創董子毛公二祠及浣花三陳東坡遺直四書  
院所著有方舟聯舫二集奏疏詩文若干卷

羅州府志

羅江縣在綿州西南七十里自縣至省一百九十里至

京師四千五百五十里東西距五十里南北距六十五里

羅江縣志

卷二

六

補刻

羅江縣志卷三

邑人李調元雨村稿

四鄉

蓋自四城門出東南西北之四鄉而總言也東至雞鳴橋四十里交綿州界西至廣濟橋十八

里交德陽界南至濳子口三十五里交中江界北至象鼻嘴三十五里交安縣界東南二十里至羅漢塢交中江界東北二十五里交安縣界西南二十五里交中江界西北二十五里至六女堰交綿竹德陽彰明三縣界縣內分為六村縣村東村畧村上村下村新村

東鄉

羅江卽東門河也右水自安縣來卽安昌水也左水自綿州來卽涪水也合流而經此蹙成羅紋縣因以名亦謂之紋江方輿紀要

羅江縣志卷三

按今東水自安縣石堰子經臭水河過神泉之塔水場來西水自睢水關白溪河兩河口來至北寺合流而南至中江並不與涪水合涪水與龍安水皆歸舊州大江此云涪水誤

芙蓉溪在縣東一里一名蚌溪又名三柴水源出白馬關山下東南曲流十五里至城南入羅江四川通志

東山巔有景樂寺乃唐高宗神龍中所建本名寶明寺宋大中祥符初改今名相傳十三尊者遊戲之地也廣

斷碑

邑庠生張元和同室唐氏

男張永程祥發

玉京山景樂宮修砌

神臺一座塑像

川主聖像一尊

沐手謹白

成化八年八月十二

按此碑乾隆五十五年九月道士劉靜虛忽于地掘出字半剝落其可辨者僅四十八字存此可以

羅江縣志

卷三

二

知玉京山之所名

調元玉京山訪琴道官劉虛靜時戴劉二生先在步屨玉京山景樂閣虛做山靜寂無人但聞棋聲響戶外有屨二排闥竟入幌不復論主賓脫帽同抵掌地既曲且幽天氣亦清朗秋陽曝人背茶罷汗流頰菊  
花翻東籬淥竹映西廡雨肥蕉葉大林深石芝長香  
櫟何馥郁乃知此處廣贈我攜袖中芬芳自天上本  
鮮俗累牽又獲同心賞經旬住綿城得此一日爽回  
語琴道人明日再來訪

調元遊玉京山景樂宮聽道官劉虛靜彈琴一首到

門琴忽止羽扇出前軒便請閉雙戶凝神爲一彈焚香翔白鶴度曲引青鸞此去蓬萊近微嫌尙作官遠屋蕭蕭竹人閒無此幽忽聞過站馬驚退出關牛地好偏隣郭仙居只愛樓知君日無事坐對水悠悠

東山寺巖下有川主石龕

玉京山漢嘉訓導朱光庭石龕川主碑記能禦大災捍大患有功德於民者則祀之非是族也不在祀典名曰滫祀滫祀無福玉京山道士就紋江石岸刻龕肖川主像祀之工竣請記其事余曰道士知川主爲何人乎曰秦李冰也曰非李冰趙昱也隋青城人趙

昱與道士李旺遊屢徵不起後煬帝辟爲嘉州守時州有蛟患昱令民臨江鼓噪與其七人仗劍披髮入水斬蛟奪波而出江水爲赤蛟患遂息開皇間入山踪跡之不復見後運餉者見昱乘白馬引白犬偕一童子腰弓挾彈以遊唐太宗封爲神勇大將軍廟祀灌口明皇幸蜀封赤城王宋張詠治蜀蜀亂屢得神助蜀平事聞封川主清源妙道真君是川主趙昱也非李冰也有功德于蜀者也道士曰然則刻石龕肖像祀之無乃不可乎曰昔蘓長公爲潮州韓昌黎廟碑文云公之神在天下如水之在地中無所往而不

有今刻石肖川主像祀之安知神之在石不猶水之在地乎道士笑而請曰願卽以是爲記玉京山住持道人譚至正

江南貢生周文麟東山寺詩并序羅江宰沈公潛余中表昆也延予隨羅三年會沈公卒于官清貧未歸因縣尉劉公定並邑人延予授徒留東山寺因感懷偶作城外東山一片青無邊景色在山靈參天老栢爲冠蓋繞舍修篁作障屏老衲聞鐘尋古寺遊人隔水望潺亭閒看山下紅塵擾馬足車輪總未停 同是山高共水長眼中景物意中傷賢候白髮悲前路

羅江縣志

卷三

四

鷓鴣客青山望故鄉淡月微雲蕭寺外淒風苦雨古城旁閉門且讀離騷句飲露餐英問彼蒼

舊縣志

大井舖縣東十五里有明萬歷四十五年十月十五日都察院役舖兵碑

金山舖縣東十五里卽古金山郡驛站又有崇正十五年七月都察院禁役舖兵碑

調元宿金山舖拜東嶽廟詩二首森森無患木陰稠東嶽行祠在上頭一夜拜香眠不得看書惟借佛燈油入夜何須秉燭遊天街自有月光留人聲已靜雞聲起誰對疎燈話酒樓



東嶽廟縣東三十里去金山舖一里有明天啓七年碑  
調元夜宿東嶽廟恭迎仁和孫補山節相准大員年  
老優免當差詩四首黃閣元勳再鎮邊岷峨歡氣遍  
閭閻羣臯出塞兵三路嚴武回朝帥兩川燮理陰陽  
沾澤溥節和風雨沐恩偏老農家住金山下望見旌  
旄喜欲顛 和如靄日肅如秋百鍊堅剛遶指柔師  
誼未忘存趙氏公房師義烏令趙宏信已沒君恩深  
諱伐交州公征交趾已連破其城封爵上公五銖不  
待黃牛復蜀中自乾隆四十三年後錢多私鑄以至  
小錢兼行商民交病公奏聞重鑄制錢銷  
私錢其雙轂爭看白鹿輪如此福星如久借 九重  
獎始絕

羅江縣志

卷三

五

西顧復何憂 文武才原將相兼運籌難得是神恬  
一車兩僕清如水萬騎千軍靜若箝竹馬兒童望風  
拜杖藜父老惜霜鬢就中獨有支離叟感泣私襟涕  
盡沾 歸來鴛鴦化鷗鳥只把烟霞自樂娛得句每  
遭人敗興清狂非是白身污愧非徐孺蒙分榻豈料  
文翁再剖符從此漁樵亦安堵殘山剩水任妻孥

羅江至雞鳴橋四十里

交綿州界

雞鳴橋西山勢蜿蜒古明月坡也舊有碑記坡下有泉  
涓涓若滴味如玉乳山人魏鳴臯酌而甘之修治成井  
護以松竹辛丑歲其叔解元倣祖爲題精泉二字於石

自是精泉名始顯綿州諸生嚴履豐有精泉賦

嚴履豐精泉賦伊一泓之秋水具萬斛之源泉拂雲  
根而味美溜石罅而色鮮鳴琴則涓涓而繞韻漱玉  
則皎皎而同妍豈曰無源非刺山於此曰是爲有本  
問剖竹以何年原夫泉也者或則稱醴或則稱温當  
暑則氣尤冷冽逢秋則色更澄清嘉名雖由人以肇  
甘漿寔自天而成維羅邑之勝地寔蜀國之佳城驛  
號金山素練流十里之外坡名明月雪花連數武之  
陰雖非元酒太羹之美堪比瓊漿玉液之精則見靜  
鑑盈盈流波瀾瀾包天列五行之先盈科爲四海之始

羅江縣志

卷三

六

飲而覺爽冰心止許伯夷涸亦尤歡矯廉誰稱仲子  
牽來竹影青可畫眉惹動柳陰綠堪彈指於是時而  
春也則數點硃砂紅郁郁蓋面映桃色也時而夏也  
則一塘翠蓋綠英英蓋背翻荷葉也時而秋也則羊  
羔美酒可以山頭望月也時而冬也則獸炭圍爐可  
以烹茶煮雪也井而非井固衆山之所同而泉又滋泉實  
此地之所獨又或夕陽西暉月影漸移風停波定之  
候霞落鷺飛之時泉聲清兮牧笛閒閒相上下泉色  
澄兮銀河耿耿共高卑蓋其一源引出百尺通流迥  
異青萍之渚寧同紅蓼之洲惟雁賓鷗戲之弗及故

吞月懷珠而自優所以三漢神娥疑瑤池之倒挂七襄織女愛昆明之下浮試問名於軒漿覺後先原自有異將比祥於堯醴豈古今迥不相猶也哉

羅江縣東北三十五里由金山舖至白土寺五里由白土寺至馬馳寺二十里

馬馳寺有寺在山谷中四時水溢可以灌田近口忽枯涸土人浚之得龍首骨中有珠衆競視之忽然雷大震珠復墜于井中名勝志

馬馳

一作池誤

井羅江縣東北三十里禱雨輒應

萬歷四川總志

正覺寺在鳳凰山馬馳井後山明初建比丘妙叢重修

羅江縣志卷三

七

有碑

明高第羅江縣鳳凰山修正覺寺碑記距羅江二十五里許有鳳凰山者蓋以形似得名一名馬馳則謂其山巔巨石肖馬跡存焉爾也山脈自安縣迤邐而來四顧有情風氣攸聚前有土主神廟據之靈響甚著不知助於何代無所於考至我國朝始建爲寺曰正覺則在其後山之阿歷載滋久頽敝日甚其中中比丘妙叢則慨然以修理爲事肇工於正德己卯迄工於嘉靖癸丑自神廟以及寺宇前後殿天王殿祖師堂齋堂兩廊僧舍皆易以美材加之斧藻靡不精

麗又粧塑諸佛祖天神天王諸像靡不煥然改觀其費皆出其力耕之餘日積月累相時而圖間有鄉耆善士助其不及者則亦不辭是故歷三十餘年而後完美其用心亦勤且久矣夫今之時非如來所謂末劫耶其教法行于中國已非一日而未劫之人雖投身沙門號爲佛氏之徒者亦往往畔教而放恣日營營以爲身謀况諸凡民乎妙叢之重其教不私其財而爲是不朽之圖者可不謂難得矣乎叢且年幾七十貌龐而神清宛然一大阿羅漢也厥工旣畢叢又肆設水陸報恩諸大齋以爲幽明之助乃今無復爲

羅江縣志

卷三

八

有爲法矣余聞叢別爲禪室頗幽僻于是乎從事於無爲以求如來向上事則法中所謂福慧雙修叢當兼有之矣其庶幾無忝于兩足尊而茲山將不因叢而益重耶余旣爲記之又從而勗之夫道豈遠乎哉古德有云卽心是佛是在叢用心何如耳叢俗姓彭氏潼川州和鄉人幼而師事本寺比丘曾天曾天爲默庵入室弟子則常受法于雪峯禪師者也其詳別有紀載故不多及其諸相助善士有不可泯則書諸碑陰昔嘉靖三十二年歲次癸丑秋八月吉旦賜進士弟中憲大夫前雲南提刑按察司副使左綿高第

換郡人鳳岡方妙恩徒永乾協心立石

明釋桂菴洪靜禪師藏身碑記

師諱洪靜字默菴古渝棠人也姓黃氏母曾生師貌古德性寬柔蚤遊釋闡惟慕出家其親遂捨於邑之西禪投禮吾祖雪峯大和尚祝髮爲徒名曰洪靜具戒習禪傳之巾瓶八九載矣于一夜中焚香入室禮而跪曰予欲諸方雲水一回特來請問如何是見性成佛一着大事祖乃見其至誠懇切遂以從上七佛至於列祖以來不列文字遞相直指心源不踐階梯徑登佛地之旨而印其心叮嚀告戒許爾諸方涵養

羅江縣志

卷三

九

去也不可以少爲足生死一着大事直要討箇分明方可休心歇意子若到此田地徑來與你証盟師聞命矣拜別辭之遂持錫不日而止於梓州張居士志禮志通作成住玉隱山寶峯山掛錫落包隨時飲噉數卽通法院清瓊禪師究明生死四大無常迅速以得心法守分甘貧罔覺名播大方由是前綉衣公姓盛名梟者除授羅江知縣下車以來徧詢境內山川因到馬馳目其年代暨遠聖像儼然窮其源靈驗莫測問其景則有仙井浴光龍洞曉霧古栢撐天鳳凰撲地故號鳳凰山正覺寺其間則殿宇傾頽大廟則

久曠焚獻衆皆以師薦于盛侯卽者老涂鑑陳權持  
書請以就命給以印信下帖推以任持師弟祖高不  
幸幼而椿殞惟事曾氏八十有一晨昏定省孝養益  
整盛曰出家若子者鮮矣所感率其同僚暨諸掌吏  
利武畧將軍張侯昨乃父乃子各捐已俸導諸旗老  
士子張舍曼昺助緣禪師重修大廟以展禪林以致  
正殿兩廊法堂齋堂三門退居端塑金容圓覺諸天  
龍神祖師聖僧羅漢莫不恢恢焉晃晃焉雖古之祇  
陀林不過是也且盛侯遵奉欽差巡撫汪并諸三司  
保陞叙州府事去後不輟省願猶得張侯父子眷願

羅江縣志

卷三

十

無怠又弗寧於是禪師後得新令尹汪侯自到任時  
仍與盛侯撫字駢新德政相耀其奉神衛教之心若  
同車轍香名并馳真爲民父母也吁太宰之善非筆  
舌能盡焉禪師一日造于荒山從容告曰人生霄壤  
所得緣聚而生緣散而蕩然性命須無生滅而虛幻  
之質奚有堅耶吾茲于退居後豫造藏身之記非塔  
非塚平實成焉周圍方丈許上以砌石爲臺中豎其  
碑特於禪旨□□□□愚謂性者天生至神壹靈之  
謂也命者先天至精壹氣之謂也性之造化係乎心  
命之造化係乎身是故身心者精神之舍也精神者

性命之本也學者罔知性命兼該知命者不明其性見性者不達其命天命終時莫知所歸惟聖而知者知性知命不生不滅終無所泥若子思于中庸首曰天命率性修道謂教皆是也天以陰陽五行化生萬物我而物我稟之爲靈覺之性照耀古今凝爲一身之主八識五官每聽命焉嗟乎南榮越問道老子云抱虛守一履道合真此性命之正也以宏辨禪師言之唐宣宗得以究明性命之端紫袍敕天下修祖塔各令守護以俟司所歷恐遇涅槃亦爲此也昔裴休禮黃蘗爲師亦爲此也今我禪師幸得摺紳君子衛教者

羅江縣志

卷三

七

衆皆道所感然也豫修藏身之塔已就又以性命爲重而言也可謂上知天命之盛衰能順造化之消長可使百世之後目斯碑者如睹景星慶雲之美無以異也予筆述至此忽有客問如何是性命無生滅處予曰景換年摧天不易海枯石爛月還圓予雖不敏姑述此以塞其請文出桂菴之藏口書文者口口口口之永綱皆六明成化十三年歲舍丁酉正月初一日庚子朔謚盟官知縣汪顯典史羅勝千戶張瑋百戶李推日上

調元遊馬馳寺記馬馳寺在綿州北三十里中有靈

井爲州八境之一夫余家僅十里許髫年讀書鶴鶴寺寺去井不十里心久慕之思一遊而未得後服官三十年時時在念人有問者愧無以應也今年九月二十六日黃葉初飛菊花滿地余弟龍山謂予曰曷不作馬馳遊乎余欣然便攜門人黃生從一奚童肩輿出門由馮家嘴山口小徑過雙石橋迤邐至寺寺在鳳凰山麓左爲九龍山橫雲擁翠迴環如抱右爲金頂山山頂一松如繖如蓋登山四望氣象萬千洵一大道場也殿宇五層第一爲樂樓樓下有巨石如馬足印痕寺所由名也二層爲靈官樓三層爲金剛

殿再上四層爲關帝殿再上卽佛殿矣所謂土主廟已毀而基猶存兩廊十餘間僧二三人不免古寺半落之歎禪房前有古桂樹大可數十圍蔭蔽一畝百餘年物也西廊下有紫薇樹根幹奇古如攬如拏皮脫而膚現搔之則動所謂怕癢樹也東簷有樹一株如盃大葉似枇杷而長可尺葉皆叢于顛皮似白楊異之僧曰此水冬瓜樹也六月開花八九月結子成穗然究不知何木也殿前石臺下有碑爲明嘉靖三十二年左綿高第爲比丘妙叢撰正覺寺修理記又由外垣折而之殿後爲明釋桂菴爲其師默撰藏身



碑記四方砌石碑高一丈寬四尺所謂搖亭碑動者  
今已圯兩碑皆爲荆棘所縛而字尙明顯亟命子弟  
與門生錄之顧所謂靈井獨不見僧曰井在山下方  
家墳去此尙一里盍往觀乎遂命僮人肩輿覓路至  
則井在野田中有兩婦方據井雪蓋旁有兩汲甕曰  
此必是矣問之果然其井面有整石板方其外而圓  
其口縱橫八尺有圓石井蓋仰卧于地寬廣亦如之  
問之老民曰此井向有浴光如佛背光然每風和日  
朗井中絲氣或上則爛熳爲雲雨旱禱輒應故啓閉  
必以時不知何年爲浴衣者所穢遂不復光今不靈

羅江縣志

卷三

三

矣故不復閉然壩中民籍其泉以溉田可灌二百餘  
畝則仍食井之報也然不敢浴浴則病故皆尊之曰  
聖井云余聞而益異之視其深不過數尺而泉流混  
混晝夜不舍遂至澤及百家此而不靈更何爲靈乎  
佛光之照若有若無何益民生則固不以此而易彼  
也使天而雨珠飢者不可以爲食又何必詫龍珠出  
骨雷震復墜之奇奇怪怪哉老人與余弟皆以爲然  
故記之

由馬馳寺西至風神廟十里東至楊家菴十里

羅江縣志卷四

邑人李調元雨村稿

南鄉

羅江南門至南塔五里

天台山在縣南山似吳之天台折腳之水出焉

太平寰宇記

王嘉會補修天台山記堪輿家動言形勢予嘗屏之而弗信謂其說近於誕不可盡諉之以廢人事也然而崧生嶽降自古誌之蓋山川靈淑之氣其間蜿蜒鬱積而不可解者不鍾於物則鍾於人故必有魁梧奇偉之士焉此乃理勢之自然不足深怪今必從而

羅江縣志

卷四

一

悉屏之以爲不可信勿乃矯枉過正耶羅邑地雖葺爾有明三百年間頗稱才藪若高節陳良翰金深吳瑛輩後先繼美彪炳一時可謂盛哉迨奉 聖朝雅化重熙累洽百年于茲宜乎士之乘時奮興蜚聲藝苑者所在多有而羅邑人士往往以青衿終老自順 江庚子科後八十餘年登賢書者指首一屈又何衰也此豈昔之易而今之難歟抑或廢興有由而所謂形勢之說多缺畧而未講歟庚申仲予膺簡命來蒞茲土爰於課士之餘問厥所由邑人士告予曰城南里許有山名天台北望雲蓋西臨大霍蓋一邑形勢

之所在也舊有文筆峯遭兵燹後傾圮者久矣羅之類頓不振或職此之咎歟予聞是說而信之乃率邑人醵金補其巔三閱月而工竣孤巒出雪巋然屹立向之所謂文筆峯者宛然如繪將自茲以往人文蔚起甲第連甍宰是邑者與有榮施伐石記事之請予雖不文亦烏能辭然猶有說孔子云譬如爲山未成一簣止吾止也譬如平地雖覆一簣進吾往也茲山崩頹剝落不知經幾歲月而一旦慨然有志修之不數月而告成此平地爲山之明效大驗也使邑人士以此爲山之志轉而爲學窮經稽古斬爲國家有用

羅江縣志

卷四

二

之才夫安知由小成以底大成不有較勝是山者乎予旣喜其能修是山而又懼其狃於形勢遂因之以廢人事也故并著其說以爲邑人士勗焉乾隆五年

庚申

舊縣志

文筆峯南塔乾隆十八年知縣潘陽孫志祖建

知縣孫志祖重修南塔記嘗讀詩至崧高維嶽峻極于天維嶽降神生甫及申未嘗不掩卷而嘆曰人之傑地之靈也然人因地傑而地之靈尤必籍人工之培修而始顯乙丑冬銓補茲邑聞之竊私心自喜曰予得覲文光矣羅邑風稱文藪元宋以來弗深考有

明前代人文蔚起甲第聯鑣蓋煌煌乎盛地也迨抵任後調冊按詳科第竟寥寥不數覩是豈今人之不古若耶抑兵燹之餘未嫻誦讀遂至微缺若斯耶予竊疑之公餘揖紳士父老詢其故僉曰城南外里許有天台山不知起自何時相傳上有南塔焉爲通邑文風所關國初以來傾塌如平地由是歷八九十年委頓不整辛酉前任王公宰是邦率邑人建之二水環流一峯聳峙是歲化楠李君鄉會聯脩而是科郭大有亦副鹿鳴自此之後未及一歲圯壞如舊迄今十年諸生落落不偶任與前等夫塔立而興也勃焉

塔廢而頽也忽焉邑士之興頽其迨操券於茲山歟抑成敗興廢天實主之非一塔之微能握造化之權歟但稽之往古東澗西瀍元公不憚相宅之勞而紫陽朱子亦往往艷稱地理則斯言也亦未可厚非也夫學問之道如山然其進其止皆在於吾諸生誠能深九仞之懷切切磋之懼積小高大層累以幾於有成亦若茲塔之高聳出雲崢嶸倚漢而突然塵埃之表縱不克騰驤道路已足增光士林矣矧實至者名自歸耶然則謂斯塔爲邑之文峯也可並爲諸生之師保也亦無不可緣是記其事之始予之惓惓于諸

人士者以壽諸石

廣漢諸生張懷敷偕玉京山道官劉虛靜遊南塔詩  
二首官路高於樹孤城小似拳大江流碧海一塔指  
青天山密幽禽避雲深古佛眠夕陽霞不散化作蒲  
江烟 絲岫烟霞古丹房草木幽花間迷白鹿松下  
臥青牛塔勢飛南嶺鐘聲動北樓羽衣無箇事音韻  
自悠悠

按二詩或誤入玉京山其實遊南塔作也應移于  
此

南塔文昌宮碑記邑令孫志祖建

羅江縣志

卷四

四

又志祖文昌宮碑記云文昌之廟祀於今也凡縣皆  
然矣而我羅獨缺予抵任有志建之而未暇壬申秋  
修南塔成偕諸同人並邑紳士父老登高望之見山  
麓間有遺址全然而高士人曰此古廟基也俗呼南  
寺明季毀於寇遂成荒蕪予用是慨然曰此其文昌  
之宮也哉爰倡捐募化卽其地構廟三楹中塑帝君  
聖像或者曰茲非七曲山文昌之宮也得毋以帝君  
文明之主也塔所以培文峯者也更相表裏  
者歟然使予僅以掌桂籍主祿位而建此也不幾啓  
後人徼倖之心哉考文昌先越雋人因報毋讎徙居

梓潼秦代而後屢著靈異是帝君固一代孝子也又秦惠王遺蜀王美女遣五丁運之帝君諫弗納怒逐之是帝君又一代忠臣也邑人士登斯山望斯塔瞻禮斯廟觀感具起焉不徒沾沾舉子業將求忠于孝移孝作忠後之過斯地者咸嘖嘖稱羨曰此某忠某孝故里也不必登科登甲已大增士林尤足爲吾黨榮矣况忠孝上格蒼穹寧有忠孝神而不錄忠孝人者哉又何必竊竊然以七曲疑也予于是爰筆而記之乾隆十八年孟夏月吉日

墨香泉八分詩刻

羅江縣志

卷四

五

墨香泉

墨香泉註

泉源混混自天成最  
喜長平澈底清皆奇  
文多將墨浣詎爽醪  
客引觴行盞香日煖  
滿芳徑樹色春曖腴  
古亭憶管叢之若聞  
此也須雙筆草黃庭  
萬曆壬寅仲冬楚江夏  
桂程宗道題

調元墨香泉并序云墨香泉在羅江南塔天台山下  
向聞玉京山道人劉虛靜爲余言欲遊未果今年正  
月十九至東山邀虛靜同遊乃過芙蓉溪披荆剪棘  
沿江而上有石曰釣魚磯亭廢尙餘柱眼折而東上  
有巨石鐫上天梯三字爲邑人蘓字姚大護書無年  
月稍偏又有石書山高水長四字失名姓再上卽觀  
音堂今爲邱氏祠堂翠竹青松與怪石相間旁石楷  
書釣鰲亭三字石俱橫卧刻龜蛇魚鼈之形其有泉  
滋滋流注廣三尺許纔如牛蹄洿而水黝黑終年不  
竭虛靜指曰此卽所云泉也上有隸書三大字曰墨

香泉並題詩云泉源混混自天成最喜長平徹底清  
時有文人將墨浣詎無詩客引觴并芷香日暖蒲芳  
徑樹色春深腴古亭憶昔羲之若聞此也須蘸筆草  
黃庭萬歷壬寅仲冬楚江夏處桂程宗道題此碑向  
爲州志所不載余因採入梓里舊聞並紀以詩云我  
生好遠遊最近返不曉聞道南山下有泉出林表厥  
名爲墨香未到已傾倒朝來同羽衣訪此小瑤島細  
逕如羊腸曲磴隨飛鳥伊誰釣魚磯投綸餌陽鱈至  
今餘柱礎亭廢已難考遂登上天梯便覺衆山小何  
年觀音堂邱祠已改造翠竹夾青松小棘扶大棗亂

羅江縣志

卷四

七

堆石亦奇刻劃工頗巧遙望釣鰲臺颯沓龜蛇擾忽  
聞琮琤聲俯見琉璃湫上下有黑蛟沉上有盤龍繞  
欲飲愁心黑成文試手撓黶黷陰氣多濁泥阿膠少  
借問誰著書遺下洗硯沼得非烏玉珎又爲唐生討  
不然松滋侯曾於此浴澡復疑元香守甘澍從人禱  
懍恍不能明誰復探幽渺細觀泐石人爲明程宗道  
詩固庾信清隸亦李斯好生爲羅江人不識羅江寶  
急付小盾膽留作縣乘稿

羅江西南有龍池山

文獻通考

龍池山在縣東南三里山上有池池上有伏石如龍蟠



太平寰宇記

又十五里有羅漢寺

有寶峯菴斷碑明崇禎五年立

泉聿廣嶧麓

壘壘限阿訶

按寶峯菴卽今余家菴也今毀存此十篆字可以

查全碑

羅江縣志 卷四

八

明鐘

慧覺寺



按明鐘可知建慧覺寺之由來

南至濳子口三十五里 交中江縣界

黃水河過羅江東門河八里往南係山溪水

五郎溝至金山舖倒石橋入境至鄧家嶺二

三倒楊羅綿交界約一里卽濫泥溝鼎元驥元兩翰林

父墓在焉有墓誌銘

誥封文林郎李公香如墓誌銘

化樟字香如號潔溪羅江人祖美實生英華英華生  
化楠化梗三卽君也生而沉毅好讀書受知督學葛  
克明先生爲上庠屢應鄉試薦不售自知不投時好  
乃奮力于古之教子必子擇師之論遠邇必負笈隨  
後從旁督見師講不合卽攜子去人稱善教子生平  
喜行善事家愈困行善益力稍有餘則以周鄉里之  
貧乏者常述程子語語人曰一介之士苟存心于愛  
物于物必有所濟若必有餘而後濟人則終身無濟  
人之日矣以故鄉里緩急來告無不量力應間有立

羅江縣志

卷四

九

券者屆期無償以情懇輒爲焚券然性嚴介寡言笑  
見人作非禮卽面斥爲人排難解紛無阿私有構訟  
者得府君數語曲直立判遂罷訟後以日用不支棄  
農學估共事三人君專掌出入或有語君曰筆下多  
撇便足致富君曰冥冥中何可欺耶卒無毫釐私  
歷半載獲利千餘金歸成都聞故人子楊四知者以  
負官項繫獄杖病殆死君解囊代償之出之獄故估  
亦無獲嘗慨然曰人生功名必由積累吾祖忠厚傳  
家譬如山然愈高愈積自問無虧心事旣不得功名  
于身將必得之吾子旣而長子鼎元次子驥元相繼

成進士入翰林勅封如其官三子本元亦中鄉試人  
皆謂爲行善之報云性孝友事親每食必嘗長兄卽  
順天北路同知府石亭公師事尤謹獨次兄其勝未  
得一官屬鼎臯封以成全美五十年恭遇 國壽君  
年合例奉 旨入千叟宴與宴于 乾清宮 欽賞  
御製千叟宴詩一章壽杖朝珠如意綉綾洋盤螺  
爵磁鈎皮盃各一貂皮紗綾各二有恭紀 聖恩詩  
蒙 恩刻入千叟宴詩集宴畢又恭和 御製元韻  
詩曰春王正月正春妍法 祖重開玳瑁筵萬壽無疆  
欣就日 一人有慶遇斯年瓊膏玉液沾 恩渥海

江縣志

卷四

十

錯山珍荷 賞延獨有微臣歌既醉賡揚頻聳作詩  
肩卽日又恭繪 御賜諸珍圖各紀以詩合刻成集  
真異數也卒年享壽六十一賜進士及第經筵講官  
誥授光祿大夫東閣大學士禮部尙書兼管禮部事  
務南書房尙書房行走軍機大臣韓城通家弟王杰  
頓首拜撰

羅江縣志卷五

邑人李調元雨村稿

西鄉

西寺城西一里有憇亭

王嘉會憇亭記羅雖葺爾邑而介在隴蜀爲往來孔道冠蓋相望歲無虛日以故官斯土者迎送之事最劇郭外半里許西寺下舊有屋三楹不幸爲風雨所破壞予乃偕廣文廖君駐防駱君縣尉劉君重葺之凡有迎送輒止其中而題其額曰憇亭嗚呼豈謂予與諸君子馬蹄逐逐至此暫憇云爾哉凡吾邑之出羅江縣志卷五

一

者入者四方之往者來者以及負戴奔走困頓飢渴思息肩而駐足者皆可憇也是則予名亭之志也夫

乾隆壬戌仲夏

獅子橋縣西一里 舊縣志

萬安驛在羅江縣西舊經云唐明皇幸蜀至此聞驛名嘆曰一安尙不可况萬安乎移宿真明寺舊驛碑所載如此 方輿勝覽

昔有碑書一安且不可之句云是立宗親筆今亦毀蝕

圖經

宋張續萬安驛詩勁兵重作付胡奴毆雀毆魚計自

踈地入萬安知幾許却憐此地始回車

全蜀藝文志

按續字季長蜀唐安人隆興元年進士官大理少

卿

七里橋縣西七里下即芙蓉溪

舊縣志

白馬山郡國志云昔漢高帝乘白馬過此途有祠

太平寰宇

按白馬山今為白馬關考漢魏地理志以下至元

和郡縣志以上諸書俱不載白馬之名始見于宋

樂史太平寰宇記據引郡國志則漢高乘白馬過

此途有祠是白馬乃漢高遺跡也今俗傳昭烈與

羅江縣志

卷五

二

龐士元換白馬中流矢乃出自小說三國演義因

高帝白馬而附會其說不可據也

白馬關在縣西南十里與鹿頭關相對

太平寰宇記

白馬關山至險峻有小徑僅容車馬三國時營壘也其

下為落鳳坡鳳雛先生龐士元侍昭烈于此卒于流矢

下其葬在鹿頭關桃花溪東岸葬時人見白馬逸出

讀史

方輿紀要

漢龐靖侯統士元之墓

漢龐統傳龐統字士元襄陽人也少時樸鈍未有識者

賴川司馬徽清雅有知人鑒統弱冠往見徽徽采桑子

樹上坐統在樹下共語自晝至夜綴甚異之稱統當爲南州士之冠冕由是漸顯後郡命爲功曹性好人倫勤于長養每所稱述多過其才時人怪而問之統答曰方今天下大亂雅道陵遲善人少而惡人多方欲興風俗長道業不美其譚卽聲名不足慕企不足慕企而爲善者少矣今拔十失五猶得其半而可以崇邁世教使有志者自勵不亦可乎吳將周瑜助先主取荊州因領南郡太守瑜卒統送喪至吳吳人多聞其名及當西還並會昌門陸續顧劭全琮皆往統曰陸子可謂駑馬有逸足之力顧子可謂駑牛能負重致遠也謂全琮曰卿好

羅江縣志

卷五

三

施慕名有似汝南樊子昭雖智力不多亦一時之雋也績劭謂統曰使天下太平當與卿共料四海之士深與統相結而還先主領荊州收統以從事守耒陽令在縣不治免官吳將魯肅遺先主書曰龐士元非百里才也使處治中別駕之任始當展其驥足耳諸葛亮亦言之於先主先主見與善譚大器之以爲治中從事親待亞於諸葛亮遂與亮並爲軍師中郎將亮留荊州統隨從入蜀益州牧劉璋與先主會涪統進策曰今因此會便可執之則將軍無用兵之勞而坐定一州也先主曰初入他國恩信未著此不可也璋旣還成都先主當爲璋

北征漢中統復說曰陰選精兵晝夜兼道徑襲成都璋既不武又素無預備大軍猝至一舉便定此上計也楊懷高沛璋之名將各仗疆兵據守關頭聞數有牒諫璋使發遣將軍還荊州將軍未至遣與相聞說荊州有急欲還救之並使裝束外作歸形此二子既服將軍英名又喜將軍之去計必乘輕騎來見將軍因此執之進取其兵仍向成都此中計也退還白帝連引荊州徐還圍之此下計也若沉吟不去將致大困不可从矣先王然其中計卽斬懷沛還向成都所過輒克於涪大會置酒作樂謂統曰今日之會可謂樂矣統曰伐人之國而因

羅江縣志

卷五

四

以爲歡非仁者之兵也先王醉怒曰武王伐紂前歌後舞非仁者耶卿言不當宜速起出於是統逡巡引退先王尋悔請還統復故位初不顧謝飲食自若先王謂曰向者之論阿誰爲失統對曰君臣俱失先王大笑宴樂如初進圍雒縣統率衆攻城爲流矢所中卒年三十六先王痛惜言則流涕拜統父議郎遷諫議大夫諸葛亮親爲之拜追賜統爵關內侯諡曰靖侯統子宏字巨師剛簡有臧否輕傲尙書令陳祗爲祗所抑卒於涪陵太守統弟林以荊州治中從事參鎮北將軍黃權征吳值軍敗隨權入魏魏封列侯至鉅鹿太守

三國志

先主與統從容宴語問曰卿爲周公瑾功曹孤到吳聞此人密有白事勸仲謀相留有之乎在君爲君卿其無隱統對曰有之備歎息曰孤時危急當有所求故不得不往殆不免周瑜之手天下智謀之士所見畧同耳時孔明諫孤莫行其意獨篤亦慮此也孤以仲謀所防在北當賴孤爲援故決意不疑此誠出于險塗非萬全之計也

江表傳

統說備曰荊州荒殘人物殫盡東有吳孫北有曹氏鼎足之計難以得志今益州國富民強戶口百萬四部兵馬所出必具寶貨無求於外今可權借以定大事備曰

羅江縣志

卷五

五

今指與吾爲水火者曹操也操以急吾以寬操以暴吾以仁操以譎吾以忠每與操反事乃可成耳今以小故而失信義于天下者吾所不取也統曰權變之時回非一道所能定也兼弱攻昧五伯之事逆取順守報之以義事定之後封以大國何負于信今日不取終爲人利

耳備遂行

九州春秋

初平中益州牧劉焉自綿竹移雒縣城築關門云其地不王乃留孫修據之建安十八年劉先主自涪攻圍且一年軍師龐統中流矢死先主痛惜言則流涕廣漢太守南陽張存曰統雖可惜違大雅之體先主怒曰統殺



身成仁非仁者乎卽免存官

華陽國志

建安十八年夏五月劉璋遣將吳懿等拒劉備敗績皆降備進圍雒城十九年夏四月分遣雲從外水定江陽犍爲飛定巴西德陽龐統中流矢卒

通鑑綱目

按綱目質實註雒城卽雒縣明一統志云廣漢漢之郡名治雒縣東漢爲益州刺史治所晉爲新都地宋齊梁爲廣漢郡隋併入蜀郡唐置漢州天寶初改德陽郡乾元初復漢州宋仍舊元以雒縣省入本朝因之改屬成都府據此則雒城卽國朝之漢州也舊縣治以羅江爲雒城誤矣乾隆二十八

羅江縣志

卷五

六

年邑令楊周冕築城于北寺下古阜封之爲張任墓更于潺水交流處立橋名金雁橋邀作碑記予爲辨明雒城實漢州事遂寢蓋羅江在漢時乃涪縣地劉甲人物志序曰唐以前凡稱涪城卽今綿州也若使雒城爲羅江則朱子綱目於建安十七年冬十二月大書曰劉備進據涪城不應又于十八年夏五月復書曰進圍雒城矣白馬關三國時營壘去雒城七十里安知非攻雒城時中流矢卒而葬于此乎落鳳坡之名想亦後人因鳳雛死于此而名之未必當時有此坡名也果令有之何以

唐元和郡縣志及宋九域志地輿廣記寰宇記方輿勝覽明一統志皆不載其名國初顧氏讀史方輿紀要白馬關一條下始載其名蓋自近時人有立落鳳坡三字石于道旁者顧氏因採之連葬時洞中有白馬逸出之言俱未深信也

鹿頭山有鹿頭關古老云昔有張鹿頭于此造關因以爲名 太平寰宇記

鹿頭關唐高宗文擒劉闢于此 方輿勝覽

鹿頭關在成都府漢州德陽縣北三十里鹿頭山上南距成都百五十里東西兩川之要道也唐建中四年劍

羅江縣志

卷五

七

南西山兵馬使張勣作亂入成都鹿頭城將叱干逾討平之元和元年劉闢以西川叛紹高宗文討之闢城鹿頭關連八柵屯兵拒守崇文擊敗之闢又置柵於關東萬勝堆 或謂之萬勝山崇文遣將高霞寓攻奪之下瞰關城八戰皆捷大將阿跌光顏引兵深入軍于鹿頭關西斷關糧道于是鹿頭綿江諸將皆降遂趨成都中和元年黃巢亂關中帝自興元幸蜀西川節度使陳敬瑄迎謁于鹿頭關四年楊師立以東川叛高仁厚自西川進討屯德陽師立遣將鄭君雄據鹿頭關拒之仁厚曰攻之則彼利我傷因立十二寨圍之旣而悉衆陳于鹿頭關城

下君雄出戰敗遂棄關走仁厚進圍梓州光啓三年王建自閬州應田令孜之召詣西川陳敬瑄復拒之建怒破鹿頭關敗西川兵于綿竹拔漢州後唐莊宗同光三年九月遣魏王繼岌郭崇韜伐蜀前鋒至綿州綿江浮梁爲蜀人所斷紹琛謂李嚴曰吾懸軍深入利在速戰但得百騎過鹿頭關彼且迎降不暇遂乘馬浮渡襲入鹿頭關進據漢州蜀人迎降蓋自關以西道皆坦平故西川恒恃此爲巨防也

讀史方輿紀要

羅江舊縣南落鳳坡有漢龍鳳二公祠祀武侯龐士元逆獻之亂其部將孫可望燬之夜夢士元爲厲懼而新羅江縣志

卷五

八

之壯麗倍往日王屏藩亂蜀祠復燬今惟一石狻猊尙存隴蜀餘聞

孫可望與李定國皆張獻忠義子冒張姓號東府西府後獻忠敗死俱走入滇戰敗乃降封可望義王世襲賜第東長安門外可望死其子徵灝襲封康熙十二年降封慕義公蜀綿州鹿頭關龐士元祠可望重修有石坊大書僞銜柱國太師兵部尙書凡數百字猶稱張可望云 池北偶談

唐杜甫鹿頭山鹿頭何亭亭是日慰飢渴連山西南斷俯見千里豁遊子出京華劍門不可越及茲險阻

盡始喜原野濶殊方昔三分霸氣曾間發天下今一  
家雲端失雙闕悠然想揚馬繼起名碑兀有文令人  
傷何處理爾骨

杜詩

鄭谷蜀中馬頭春向鹿頭關遠樹平蕪一望間雪下  
文君沽酒市雲藏李白讀書山江樓客恨黃梅後村  
落人歌紫芋間堤月橋燈好時景漢庭無事不征蠻

雲臺編

宋趙抃過左綿偶成東西再守二年間徙蜀何須問  
險艱入覲已違龍尾道出麾還過鹿頭關與民共約  
三春樂顧我都忘兩鬢班歲滿乞骸何處好仙棋一

羅江縣志卷五

九

局欄柯山

清獻集

宋陸游鹿頭關過龐士元墓士元死千載淒惻過遺  
祠海內常難合天心豈易知英雄千古恨父老歲時  
思蒼蘚無情極秋來滿斷碑

劍南集

張漢白馬關龐士元祠尋訪當年龍鳳姿兩公伯仲  
合同祠伏龍未起三分定落鳳前占一死奇蜀魄有  
聲悲杜宇楚魂無地赴湘壘風雲不了英雄事腸斷  
空山暮雨時

周文麟龐靖侯祠王路馳驅謁靖侯魏我廟貌屹千  
秋卧龍早解三分定雛鳳還爭一計優壘壘青山祠

外曉森森翠栢墓前幽南州冠冕人何在坡上猶餘

浩氣浮

舊縣志

李化楠謁靖侯祠夾道陰森漢代松靖侯祠墓白雲  
封三分已奪曹瞞氣中計能邀漢主從不改蒼山長  
鬱鬱徒留碧血恨重重漫言落鳳魂孤寂明月相歡  
有卧龍

調元鹿頭關謁龐靖侯墓祠內並祀武詩江鎖雙龍  
合關雄五馬侯益州如肺腑此地小咽喉事急爭雞  
口時平失鹿頭至今松栢塚風雨不勝愁 誰言此  
州小曾有鳳雛來首獻三條計洵非百里才生無慙

羅江縣志

卷五

十

驥足死合遣龍陪一自星飛後千山澗水哀

棲鳳亭乾隆五年知縣李德瀚建周文麟記

羅江縣南十五里有羅瓊山

元和郡縣志

綿州羅江縣羅瓊山有羅瓊洞昔羅真人名瓊修道上  
昇之所也其洞凡有水旱疾癘禱之靈無不應太平興  
國五年庚辰歲中秋彩霧輕烟月光如晝香風瑞氣瀰  
漫山谷四遠村民登層巒而望之唯聞音樂環珮之聲  
遲明但見車轍之跡去洞十里餘闊一丈以來礮土深  
三四寸其轍跡隨山勢高下直至洞門迤邐狹小卽不  
知神仙乘車出洞耶音樂之聲晝夜不絕遂聞諸州縣

時殿前承旨兵馬監押知縣事陳單縣尉鄒崇讓尋詣  
仙洞觀茲轍跡樂聲以事奏聞詔大九井山虎耳先生  
李洞賓賞香於洞前設醮禮察視之由以祈靈貺虎耳  
先生大名府有道之士時呼爲李八百云已八百歲如  
五十許童顏鬢髮行速言徐每駐足士民聚觀者如堵  
先生卽於懷袖中採取銅錢二三文撒之則稍得人退  
因是每十步二十步取錢一撒至暮懷袖之中錢無缺  
焉翌日與官入洞行十里已來唯聞異香襲人樂聲隱  
隱人吏各持香燭屏息捫藤足履嵌崿魂竦汗瀝先生  
步無差跌神氣自若出洞之時衣履之上無泥滓露汚

羅江縣志 卷五

十一

之跡 茅亭客話

明石鼓墩



羅真觀石鼓高二尺周圍一尺腹徑二尺式如鼓四面  
鐫夔龍文中刻七字大明正統元年造蓋僧家坐墩也  
大霍山蓬萊坊

明丁宇耀蓬萊坊修道記羅江縣良募蔡公文舉原  
係湖廣黃岡縣人同本山王庠貴郭胡良郭鳳因祈

雨見道不平發心修補山門至蓬萊

道路七十五

丈善果既降立碑爲記以爲引道接

之階邑庠生

丁字耀題天啓四年孟秋月吉旦

大霍山有羅真宮宋何彥真有記山麓有丈餘磐石耕者每宿其上輒夢云接引佛上可宿即驚以告寺僧掘其下果得像若天成不事雕琢

名勝志

羅江大霍山下有洞臺司命君之府也中有神靈瓜食之心通至玄

黃庭經註

羅江縣釋僧羣者居霍山構立茆屋上有石池如盂深

可六尺常出清泉

劉敬叔異苑

羅江縣志

卷五

三

僧羣清貧守節蔬食持經居羅江縣之霍山構立茅屋

孤在池

一作海

中上有石盂水深六尺常有清流古老相

傳是羣仙所宅師因絕粒其菴舍與石盂隔一小澗常以木爲梁由之汲水年至一百三十忽見一折翅鴨當梁頭師將舉錫撥之恐其轉傷因此回歸遂絕水數日而終臨謂左右曰我少時曾折一鴨翅也

太平興國年有人乘車往來山中石上有新轍迹深三


尺餘石五色知州仲士衡緣迹至洞口聞雞犬聲

湘山野錄

文釋書龍洞仙踪壁刻云太白山道人李洞賓實內庫

孔香二十斤詣靈山相度仙洞焚燒初抵劍門蓮老人

之告闕次離巴岸逢孤鶴以來迎及屆洞中睹雙童之  
出入已臻巴岸見玉輅之踪由又頌音樂淒清羅鉞疏  
越若非吾道神變其孰能與于斯乎勒於洞門以為他  
年會語張本 輿地碑目  
總領六卿湯公紀行斷碑



右湯公斷碑祇有上半截在觀音殿後僧覆其背用作  
砌石余命僕人洗拭得篆文八字碑工但楷文多難解  
湯公侯掘出砌石再考

明涇陽令吳白崖墓在大霍山頂旁有張素挽詩碑又  
一碑為吳仰山墓明翰林院編修劉宇亮題

明張素挽涇陽令吳白崖詩楚望家聲舊蠶叢慶澤  
延百年敦積善間世特生賢淵角人爭羨周才地所  
遷撫謙宜左右素履慎周旋輪翮輕千里詞鋒動四  
筵好修金作礪烟介石維堅雅度觀昭曠懿章逼太  
玄禰衡僉曰睿韓爽獨稱妍鑑賞驚前達源流遡昔



傳續經登抑簡強學絕韋編但使安弦巧何妨坐榻  
穿尾龍方入夢鷓鴣遂冲天合浦珠光媚豐城劍氣  
連允諧歸樾願未了榜花綠德驥鳴吳坂靈蛇兆蜀  
阡明蟾三五缺美玉始終全能子微廬墓爲郎戒飲  
泉趙張攀逸駕元魯合隨肩姱節凌西華和風蒲北  
坳深仁漸葑屋薄罰示蒲鞭黔首欣成貸青衿豫采  
甄迤亡爭復業游惰亦于田竹閣疎簾靜花村吠犬  
眠雉馴三異見虎斃一誠虔篤信推陳寔豪強畏董  
宣效忠依日月利用得坤乾淳化歌來暮涇陽喜作  
先峻階應午步逆豎苦相煎解組鳴飛鶴遺榮等脫

羅江縣志

卷五

志

蟬相如剛謝病康直遽遊仙賈傳臨單闕牟尼悟寂  
禪書香高節在政績口碑傳錦水全文藻眉山晷夜  
然友朋悲宿草林麓怨啼鶻列宿沈滄海佳城鎖夕  
煙無憂端可喜有後足光前主鬯恢三葉登羸裕四  
銓牛刀盤錯試鸞誥寵恩偏茂典榮長世英雄歷九  
淵朱絲恒奕奕戩穀耳綿綿嘉靖春二月吉日賜進  
士出身廣西布政司參政安寧碧泉張素謹題男知  
州吳士達偕弟士達士遷立婿生員可懋書

羅江縣南十八里至廣濟橋

交德陽縣界

羅江縣西北二十里由鹿頭關西至換馬溝十里卽換

白馬之訛而並訛爲王莽溝也再十里下至畧平古村鎮也有塲南交德陽綿陽江界

火神廟旁有牛王廟新建樂樓碑記

調元畧平牛王廟樂樓碑記牛王者何也農耕田必用牛牛於農有功故神之爲王而共祀之也樂樓者何也每歲祀牛王必演劇劇必有樓所以悅神而共樂之也牛王廟不知始于何時惟列異傳載秦文公立怒特祠應肇於此今諸廟多塑像如觀音而以牛爲坐騎稱之爲牛王菩薩不知何故考清異錄陽翟莊合有田老者謂牛爲黃毛菩薩大抵皆農人以牛

羅江縣志

卷五

五

爲命故尊之曰王而親之曰菩薩也王制諸侯無故不殺牛註穀者民之命牛植穀王法禁殺故本朝世祖章皇帝首重殺牛之戒而各處地方有司並嚴湯鑪之禁蓋爲此也夫戒殺牛非細事也昔齊宣王不忍一牛孟子以爲是心足王使今人而盡推此心則君卽堯舜也臣卽臯夔稷契也不忍於牛卽不忍于人矣故曰足王也今之祀牛王而並建樂樓者豈非不忍之心所感而並思悅牛神以求保衆牛哉考大玉匣記牛王神誕本在七月二十五日今以十月初一爲祭日者蓋七月農方收穫故相沿改期以

便民也畧平牛王廟本無樂樓今之樂樓乃嘉慶三  
年十月某日衆士民捐資所創立例刻名於碑陰而  
總其事者覃泰山也

又十里西至黑泥寺山下有泉灌山田數十畝

羅江縣志卷六

邑人李調元雨村稿

北鄉上

翠望亭在城北一里唐元宗入蜀縣令造亭於此祇候  
王人呼為接王亭遺址尚存名勝志

宋陸游羅江驛翠望亭讀宋景文公詩撲馬征塵拂  
不開高亭欹帽一徘徊蜀山地暖稀逢雪閨歲春遲  
未見梅陂水近人無鷺下烟林藏寺有鐘來宋公出  
牧曾題壁錦段雖殘試剪裁劍南集

按翠望接王志言遺址尚存今俱無考只有朝天

羅江縣志卷六

寺為國朝所建或其故基歟朝天亦接王意也

又二里有企僊亭乃車岩上昇處宋師堯俞作記名勝志

按萬歷總志二里有三清觀今亦無考或企僊也

北寺縣北四里許即古潺亭廟也建於明末今梁上有

大明崇正十三年歲次庚辰三月初一日甲申吉日捐

貲功德主國學監生邑人余賡鼎建三十五字尚存

縣有潺水出潺山水源有金銀礦洗取火合之以成金

銀潺水歷潺亭而下注涪水水經注

晉於梓潼水尾萬安故城置萬安縣李雄之亂移就潺

亭太平寰宇記

唐開元二十四年立潺亭碑文字磨滅尙有潺亭二字  
碑陰有宋邑令太常博士宋嘉彥書 舊圖經

宋嘉彥重修潺亭廟碑記嘉祐三年予始署邑事明年訪古跡而潺亭廟有遺址存焉東南百步有碑仆於民田中其潺亭二字亦不復睹稽其址歷數百年廟與碑俱廢是神之祀於民者不亦闕乎且俟因官之美材而復廟貌之未幾里民請自修之次年廟成秋大旱晨禱而夕雨自是潺之民益靈其神相與輓碣立之祠下時嘉祐五年也 名勝志

本朝王士禎羅江驛雨 故縣也今省入德陽城北有潺水潺亭 前旌已

羅江縣志 卷六

拂鹿頭關風雨勾留不肯閒何處行人最愁絕潺亭亭下水潺潺

去潺亭五里官堰山古名雲蓋山山紫石刻行書雲蓋仙峯四字甚遒勁 舊縣志

唐令白大信縣北五里有芒岡堰引射水溉田入城永徽五年令白大信置 唐書地理志 永徽高宗年號

韋德羅江令縣北十四里有楊村堰堰引折腳水溉田貞元二十一年令韋德築 全上

志云今縣境有芒江泉水玉女馬山迴龍乾河堰 讀史方輿紀要

涪水河俗名冷水河自西北由安縣河壩場混江鎮分派由羅江野人山入境離城三十五里由石皮灘又過石坎至獅子院東流同乾河與瀾水河合流作三堰至北寺前與潯江合流波流滌洄如羅紋故名羅江由東門外轉南二里合芙蓉溪水合流至三輛車又十五里至斜灘河又十里至潛子口出口至中江縣下流乾河城西北三十五里亦自安縣發源由彰明旱壩又至安縣觀音壩入羅江境離城三十里過石坎灌圍堆壩田至獅子院與瀾水合流同歸羅江至潛子口入中江芒江堰卽乾河水也

羅江縣志

卷六

三

綿陽河縣西北四十里自茂州牛心山發源經天池大壩至綿竹縣東北綿陽口分數派西一支灌綿竹十餘堰東一支由河壩場南流入羅江境爲乾河又中分一派經野人山西分一支灌德陽柳梢堰其綿陽河正流溉彰明穿山堰又灌羅江玉女堰出紅岩山口灌畧坪村田又爲紅岩天池二堰又東入羅境爲後壩堰又灌德陽茅包堰又灌羅江麻山堰南由德陽境下流

舊縣志

按綿陽江卽蜀都賦所謂浸以綿洛也蜀地名綿皆因之有誤作沔陽非也沔在漢中

黑水在羅江西北自安縣南流入境下流會於漢州之  
綿水五代時董璋破西川兵於黑水遂克漢州是也讀  
史方輿紀

按古今地輿諸書惟本朝顧氏讀史方輿紀要最  
爲荒謬無徵如引黑水在羅江西北自安縣南流  
入下流會於漢州之綿水而以五代時董璋破西  
川兵事爲證不知綿水與雒水並趨而下合爲渝  
水卽巴水也何曾回到漢州再往下流又不知漢  
州何處飛來黑水此非大謬乎夫禹貢所謂華陽  
黑水惟梁州所包甚大以在華山之陽華山屬雍

羅江縣志

卷六

四

州古者封域合梁於雍是也黑水出漳臘潘州界  
今屬夷地是爲岷江之始水自汶山下過猶河水  
之遶崑崙也又一派入滇而出金沙江流入馬湖  
江與汶水合今之敘瀘界瀘卽黑也諸葛亮所云  
五月渡瀘卽此也所謂四川者卽岷瀘雒巴四水  
也岷水自綿州而下瀘州自雅州而下雒水自漢  
州而下巴水自重慶而下是黑水與四水久已各  
入四支趨入于海矣安得在羅江小邑之間尙徘徊  
徂來往穿插哉顧氏又引資溪營城西北有黑水  
卽古翼水源出梁州生番寨亦南由茂至安入羅

蓋見水黑卽稱黑水皆黑水之小者也水黑約有四一漢志符縣有水出犍爲南廣縣符關山北入江此符縣黑水也又黑水出漢中南鄭縣北山諸葛亮殘云朝發南鄭暮宿黑水此南鄭黑水也三黑水出羌中南通典扶州尙安縣有黑水此尙安黑水也四崇慶州西北有黑水元一統志云源出常樂山石皆黑此崇慶黑水也皆非梁州黑水行水金鑑韓汝節謂梁州別自有黑水從夷地分流千古卓識而顧氏區區指其一爲梁州黑水誤矣平池寺縣北十二里雍正年比丘盛果修前有平池今

羅江縣志

卷六

五

涇乾隆年間如秀重修

如秀族人曾同叔  
化梅蘄浙普陀

雲龍寺縣北十五里元張無知剏明釋智寧重修有碑明吳士遷重修雲龍寺碑記按羅志北十里許有雲龍寺山峯聳翠雲覆龍盤羅之第一禪林也先是至元庚午敬菴張公無知自龍山來鍊性於此廼建觀音殿凡三楹其徒德暹復宏厯制世鉢相傳迄明嘉靖則二百有餘歲也歲久殿宇漸次頽敝觀風者多惜焉羅僧智寧者姓劉氏甫八歲性恬靜厭囂塵杖錫遊雲龍者幾六十載勵行精苦真能絕俗士大夫咸奇之且積錢穀若干藉是養性益力一日謂磐溪



子曰異哉古今之不相及也夫寺吾之禪家也敬菴  
初之德暹述焉而吾坐待其做於二師有餘愧也縱  
師不咎予將不爲山靈愧乎而况吾之所積者將何  
用也廼捐所積鳩工取材斷勵甃石今年三教殿成  
明年祖師殿成又明年天王殿觀音殿禪堂成復建  
僧舍二三十所廼裝塑天王廼塑伽藍廼塑祖師頽  
者以振做者以修圯者以興肇自嘉靖癸未迄今已  
亥告成制度宏遠煥然改觀焉而寧則不自以爲功  
也羅士大夫徃榮之因請記於磐溪子磐溪子曰夫  
寺信之萃也夫財人之心也方今遂財以自侈者環

天下孰肯捐所愛以遺人哉自非吾儒之灼見道體  
者鮮克有此今寧以墨者流而能如是其殆墨名而  
名儒行者耶豈天欲斯寺復見雲龍之盛乃微寧以  
重修之耶母亦敬菴蟬蛻以顯其異而後生寧以濟  
厥美也况寧安閑厚愨淡寂禪林入定法華趺坐松  
月朝夕乎六祖之論三觀之理固不但事師以禮事  
親以孝爾也觀彼之怪誕慢訑以惑世者其賢不肖  
何如耶謹拓諸石以志重修之意抑以表上人之功  
當垂於不朽也是爲記嘉靖十八年歲君巳亥暮春  
之吉磐溪山人吳士遷子安撰奉政大夫知湖廣茶

陵州事前已邛鄉進士邑人吳士達篆蜀府典膳所  
典膳邑人吳士達書

雲龍山扁擔灣李石亭公祖塋在焉有李氏宗祠右有  
美實公神道碑左有英華公神道碑

李化楠

俱冉玉嘉填  
諱不重出

祠堂記古者立祠堂爲四龕以

奉四代神主高祖尊祖祖父也始祖之祭始自程子  
雖朱子有似禘之疑然世遠而派別不有始祖一祭  
無以收族是亦禮以義起之一端也况所謂始祖者  
以遷居此地及初有封爵者爲之非必厥初生民之  
祖也隨分致祭何僭之有吾家上世不可知論遷居

羅江縣志

卷六

七

此地及初有封爵之義則當以美實公爲始祖而厚  
公不與焉禮曰別子爲祖繼別爲宗繼禰者爲小宗  
有百世不遷之宗有五世則遷之宗美實公則吾先  
世之別子也是爲始祖而美實公之長子世世以長  
繼別是爲大宗美實公之衆子則各以其長繼已是  
爲小宗始祖百世不祧小宗親盡則祧此古之宗法  
也故古者子孫繁衍廟制非一有禰之廟自已之兄  
弟子姓咸屬焉有祖之廟自父之兄弟子姓咸屬焉  
有曾祖之廟自祖之兄弟子姓咸屬焉有高祖之廟  
自曾祖以下之兄弟子姓咸屬焉有始祖之廟則一

姓之兄弟子姓咸屬焉其爲典也備而其爲制也詳後世人不思古親親道微生者後輪奐之觀死者無一瓦之覆匆匆送葬三載除服以爲人子之事於是焉畢歲時不告飲食不獻生辰忌日置若罔聞則求其有祠堂不可得又何論乎百世五世之縷別也夫主必有祧者一定之制而追慕不忘者報本之心近世士大夫家建立祠堂自始祖以下木主皆設廟中雖親盡而不祧此其制非古而要爲不忍忘其親之意吾家祠堂卽用其法正祠三間長房居中其高出者爲始祖二房居左三房居右各設一龕每一代爲

羅江縣志

卷六

八

一階層遞而下所謂禰廟祖廟均於是焉在大宗小宗卽於是焉分庶幾遠有所統近有所宗各分得而支派明子子孫孫皆得以展其孝思矣祠建扁擔灣係徐國玉之業今三房用價買其田地山林而以其址一所竝附近田一畝捐作祠基約同族人起造正祠十一柱三間耳房七柱東西各三間拜廳五柱三間大門五柱三間廚房五柱三間共十八間祠成改扁擔灣爲祠堂灣云

李氏族譜

李攀旺字美實羅江縣雲龍壩人也生三歲而孤母王氏再適同邑李雲卿公隨母育於李值流寇張獻忠作

亂人多逃亡時李富於財既死其僕何駒駒者謂公曰子非李氏嫡而受其財族衆忿甚不去將殺汝公於是歸時年二十三矣至則宗族盡散無一存者公子身無倚隨鄉里二三人走石泉是時賊衆猖獗所過殺傷焚掠殆盡民食無所出強者殺人而食弱者幸以身免則匿跡深山採樹皮草子爲餅充饑公嘗絕食三日夜於空宅中獲一猫燒食之得不死張養心者宋有聯之妻弟也公與有聯同避兵故識養心一日至其處養心召公同食時無碗以瓦片盛肉而已公稍嘗知其味異然不敢明言乘其不見而棄之歸以語有聯有聯曰若輩

羅江縣志

卷六

九

素食人肉者奈何食其食乎於是心影成疾腹膨久不愈聞渡夫王五善針灸就而灸之他日又至其家王五夫妻方食魚將盡止餘頭尾見公至則以食公而謂之曰好好有頭有尾子之疾自此除矣由是果愈公在石泉二年值蜀中平定乃歸住河村壩土曠多年田地荆棘中公開荒刈草獨力經營又歷十餘年粗有積蓄始聚妻卽吾祖母李氏也時年四十一矣厥後移居毛家壩又十餘年移南村壩子孫今家焉當時兵燹之後鄉人存者百僅一二而公族屬又無一人在者故前後三遷皆就伴居住未得復業公爲人忠信渾樸不校是

非凡事退讓人有犯者輒語謝之嘗謂人曰吾昔在兵劫中踰越險阻衝冒鋒刃野居露處朝不保暮自分必死今幸賴上天之眷祖宗之靈以有其身得延李氏之一綫吾何求哉吾惟有吃得虧三字可以保身可以遺後願世世子孫守而勿失至於機巧變詐是吾所知然亦羞而弗爲也鄉里以此多之至今稱爲長厚治家以勤當徭役繁重時怠惰者多失業而公未嘗缺乏遇戚黨有急貧者多所周濟以明天啟丁卯年生至國朝康熙庚辰年卒享壽七十四歲以孫化楠貴乾隆十九年賜贈美實公爲文林郎李氏賜贈孺人子三文彪士

羅江縣志

卷六

十

遼文彩

李氏族譜

李文彩字英華與兄鴻飛公學生狀貌絕類外人往往莫辨束髮受書通大義值時事艱難棄而力耕喜賓客好施捨計田中每歲入蔬布足自給餘悉以餉客遇人方窘急輒設法周濟或代出名立券後雖倍息償無怨悔有譚世民者僑寓村中聞公好善因以急難告公爲代借數十金以應已而譚孳家逸去公設措代還越數年有自金堂來者云譚在其處公置不問其陰德長厚類如此公天性過人孝友純篤兄弟之間歡然無間分居析產時公重自損抑田取其瘠者地取其不毛者謂

少服於是不須更易祖遺舊屋讓歸長房借鴻飛公另  
自營屋而住居鄉黨侃侃直言爲人排難解紛悉悅服  
又度量豁達不與人校是非遇有非禮相干之事旁人  
代爲不平公付之一笑而已晚年喜植花卉尤嗜讀書  
當天朗氣清時手一編坐北窻下披涼風謂羲皇上人  
無以過又或寄興江湖則攜斗酒至河干或垂釣且釣  
且酌放懷自適視人世繁華艷冶如無有也公性仁於  
愛物而廉於自奉長子化楠遊宦浙江公誠之曰吾家  
世本布衣今遭逢 聖主得叨一命幸矣惟作好官可  
以報 國好官必以清爲主我雖年老粗衣淡飯尙自  
羅江縣志 卷六 十一

不缺無需祿養爾其勤勞王事母沾清白以辱爾祖化  
楠謹遵其教不敢忘乾隆十九年 勅封文林郎元配  
趙氏 勅封孺人公生於康熙戊辰卒於乾隆丁丑享  
壽七十歲子三化楠化樞化樟 同上

羅江縣志卷七

邑人李調元雨村稿

北鄉中

雲龍山北象山有李石亭公別墅名曰醒園額爲丹徒編修王文治書

李化楠山居卽事詩四首有序云買地十畝築室三楹避俗離塵風景擅平泉之勝背山臨水烟霞繪輞川之圖手栽竹木漸成林樂哉斯土自是園廬多逸興老矣歸田散步獨遊曲折檻欄花爛熳憑高遠眺迷離村樹屋參差旣適志以安身亦陶情而悅性年

羅江縣志

卷七

一

華易逝那有仙藥駐紅顏富貴何時肯對靈山辭綠蟻本來面目醉裡乾坤僻地無鄰嶺上白雲常在戶高峯有主天邊明月不須錢登東臯以舒懷橐筆成韻倚北窻而寄傲薤簞生涼謂我何求只向林園尋活計於心已足不勞蓬島問因緣爰作小詩以質同好 何處堪宜着此身園林幽僻絕囂塵鋤荒結就三間屋便與烟霞作主人 山居非吏亦非仙喜得名花盡日妍酒罷長吟無一事望江亭下水連天 牽衣直上七層臺眼底乾坤大放開林樹蒼茫村舍遠白雲深處有人來 看看兩鬢白如絲角利貪名

到幾時願得人皆閒似我常來共對一枰棋

石亭詩

園中有大石缸養金魚十餘尾缸面坐小石山山上栽花木數種蒼翠可愛缸上有石亭公石刻詩

山一卷天半落水一勺長不涸上承綠樹陰下見紅鱗躍春色滿園林亭臺隨地着吾心淡無營吾身欣有托何須海外覓三山此間便是蓬萊閣

醒園圖重慶太守漢軍朱孝純子穎所畫也朱初爲珙縣令道出羅江曾遊此園後同年編修海寧祝德麟芷塘復以庚寅借檢討湖南鄧文泮入蜀典試回京路過羅江縣志卷七

二

見訪留詩次年予至京補官與朱祝相晤各憶舊遊子穎遂爲繪圖祝首題詠寄回醒園懸石壁間以後題者甚衆

庚寅四川正主考編修祝德麟題醒園圖詩并序云歲庚寅奉使入蜀時主人偃臥醒園子穎方守重慶試事畢迂道訪舊流連竟夕沙竹之勝魚鳥之樂得周覽焉主人送至金山驛而別途中用工部韻作十律寄之高下幽曠之趣摹寫畧盡越二載主人來京師子穎亦以改守山東待觀闕下別筵作畫遠形近勢如在目前醒園僻在遐陬以主人之賢凡名流入



蜀者莫不至其地至必有詩子穎亦親見者故寫景  
獨真而松風水月僅付臥遊豈所謂寓意于物而不  
留意者耶余既幸斯園之得主復不免今昔之感錄  
前詩歸之宿醒園用杜工部遊何將軍山林韻十首  
園枕山面流到時天已曛待曉登絕頂騁眺遂  
聯轡過南邨登堂拜母而別故備志蹤跡焉 跡滯

三秋後身遊萬里橋黃花明異域青鳥返重霄短李

幽居僻長須突騎招逢迎欣得主造訪肯辭遙 滅

從聯雙騎天光出郭清溪喧惟祭獺秋老不聞鶯野

爰除瓜架山妻茹菜羹殷勤語楚客何似武陵行鄧

山謂所歷徑途  
絕似楚南邨景林外波聲活潺江別一支叱牛收水

羅江縣志 卷七

磨呼鴨上陂池徑亂增樵惑巒重獨鳥知只應游屐

過荆棘已教披 漸近醒園路山寒少雜花插天峯

似象赴壑水如虵鱗鬣看松老梧捲想澤賒他年長

千尺喬木識君家園依雲龍山為址其旁曰象山李  
氏祠墓所在繞舍萬松皆尊甫所

手柴荆無洒掃今日逐江開堂構方求木雨村方謀  
與築承先

志也寒暄異望梅榻懸徐孺至黍具范卿來為問門前

路客誰損綠苔 握手讀詩集高詞源湧泉思親新

涕淚懷友舊纏綿唱和聯諸謝評詩待老錢兩邨向  
學詩于

前香樹為  
翁所極賞凋零雙桂後若箇長西川楊升菴雙桂堂  
在新都今已廢

飲我郭筒酒春醪麴米香庖烟衝暝黑園菜益津涼

選忘兒能誦杯乾婦久藏乘醺思振策下界鬱蒼蒼

熹微尋石磴曲徑半臨池真欲謀笈管偶來到接羅  
人家團竹色秋水瘦魚兒早識溪山美應令畫手隨

雪嶺明晴旭花驄撥亂雲碑前重墮淚身後但遺

交經其尊甫祠堂

拜母衣冠肅論交輩行分

令弟鼎元於是科獲名故戲之

童時釣遊處指點復紛紛 一飯南村舍臨岐意若

何別人甘語少看客比鄰多敢忘對床約難爲行路  
歌回頭問野老使節幾經過壬辰重陽後三日

調元和憶昨金山驛銷魂似霸橋獨歸聽夜雨相望  
隔雲霄仍對烏犍侶難爲白鶴招今宵燈送喜萬里

羅江縣志

卷七

四

素書遙 開緘鯨掉尾瘦字逼波清已列班中鷺猶

思谷口鷺交寧甘似醴詩却和於美此夕渾忘寐持  
吟徹曉行 痾抱年來久逢迎總強支原非揚子宅

誰問習家池鋤草憐蟲訴移花許蝶知自經君染翰  
景色競紛披 三秋纔謝菊二月又飛花忽漫逢江

雁因嗟赴壑蛇十詩寧易得千盞不難賒天意憐孤  
寂風吹過我家 人到晨星後天教積霧開諸昆非

軾轍座主是歐梅一夕成佳話千秋此偶來但看攜  
手處三徑未生苔 留客斟清聖烹茶瀉碧泉更長

眠未穩語短意殊綿香漬雲垂紙燈明夜博錢顛狂

聲不細一日遍三川 高軒來過處草木有清香衣  
帶巴江暈牀分楚簟涼詩緣聽雨作書借看雲藏尚  
喜顏皆舊毋須歎老蒼 吾家潺水曲柴屋正臨池  
天使回旄節主人方接羅擁門窺野客送榼遣諸兒  
却悔分張日車塵失計隨 並馬送君去清江水覺  
雲山川供別賦風雨助論文棧閣程空望綿州路早  
分當時腸最斷歸緒淚紛紛 寫罷鸞牋寄茫茫奈  
若何劍南鴻字少輦下故人多難忘青燈伴慙賡白  
雪歌至今明月夜猶夢使星過

順天府府尹南滙吳省欽君才美如蜀錦段過歸奉

羅江縣志

卷七

五

寢淹三年墓田丙舍計粗就來枕畫省香爐烟雲龍  
山旁象山麓潺江東遠鳴濺濺小園雖小衍先澤漁  
父信宿時黃綠一樓一閣置帖安一花一藥羅芳鮮  
亦知人情重懷土猶驚鶴怨終由天笑攀生絹乞能  
手朱老真似南鄰然古來行軍著要約馬廐往往摧  
平泉卽今松維事撻伐輸輓例藉租庸錢君爲蜀人  
朱蜀守時蠟兩屐張長筵想見雪嶺戍天外千里貼  
席忘戈鋌予於是園欠親歷巖居川觀寧非仙掉頭  
不住入京洛山水之福將唐捐賴此畫本秘行篋玉  
蟾蜍淚流微涓醒園獨醒太無賴豈若買醉長安眠

橙林他日大於斗過訪我亦浮巴船

刑部郎中桐城姚鼐蜀山西自蠻夷之中來千仞萬  
仞雪崔巍劍門山南錦江暖桑麻沃野當中開綿州  
縮轂劍關口白沙碧水環杉柳吏部平生居此州萬  
株種松百瓶酒錄詩空谷感英靈投轄使驛招賓友  
天下傳君此醒園君今却出劍關門我見君顏長不  
澤君道思家歸未得况復西山有畔夷軍與大渡河  
西北蒲氏山密豺狼驕又傳兵馬乘繩橋丁男盡力  
助輸輓園林坐見生蓬蒿前夕渝州使君至看山徧  
歷卽驪地籌邊經國意何長就君傳出西南事爲君水

羅江縣志

卷七

竹貌平分先貌松維雪嶺雲偃卧信知魚鳥樂明年  
定罷殿前軍

侍讀學士青陽王懿修卜築新堂綠野如芙蓉溪畔  
謫仙居家聲試朔平泉記手澤猶存種樹書長愛清  
閒對琴鶴未訪福落注蟲魚名園自是迴翔地辛苦  
貽謀慶有餘 仙才未合住岩阿數畝園如傳舍過  
宦跡共瞻星使遠文心應貯錦囊多春風海外新桃  
李素業山中舊薜蘿此日堂陰真濟美胡良遙接潞

河波

潁州府知府

章信有之使君圖

畫翰林詩必涉

名園醒亦宜花木

泉亭千里夢墜芙蓉

山亦有烟霞癖猿

鶴同君怨別離

編修歙縣程晉芳重慶太守能詩復善畫昨來與予  
剪燈話乘閒乘雪會上峩嵒最高頂俯矚大千銀世  
界嶺無平勢澗無聲凍雀冷雲爲一派凌虛抗手欲  
招真不信人間多芥蒂談神說鬼無此瑰且奇使我  
聆之起衰憊因覽其近詩蕭瑟空濛具得山水力醉  
後拈毫繪醒園乃是雨村所促逼雖經促逼饒遠神  
羅江亦有峩嵒春斜亭曲沼歸方幅瀉入平江月一

羅江縣志

卷七

七

輪依巖作屏植木如錦丙舍柔柔熟丹甚清泉白石  
自惺惺暢好於中圖快飲奚以獨醒爲自命狂特甚  
霜猿叫更寒噤痒墮葉鏗鏗警秋枕皇然遽然炊未  
飪斯境可稱無上之上品太守懷蜀子憶家眼中筆  
底開烟霞此時蓉溪芙蓉白於玉問君何苦留京華  
離門盡被松遮却空際描摹難捉摸後人讀畫羨遭  
逢詩家流爲詩家作

戶部主事會稽吳璜楨林籠竹夾空垣中有臨江舊  
業存彷彿翠屏過細雨荷鋤閑立聽吟猿翰林奉  
使詩曾和太守來遊畫擅長好貫郵筒多酌我當筵

一效次公狂

翰林院庶吉士德清陳墉羅江山水清且妍浮空一  
碧通雲烟雲龍之峯勢竦立俯瞰衆壑如隨肩芙蓉  
溪水環其前清光似練涵長川羣巒倒影落明鏡恍  
睹玉女高鬟懸兩村卜居蒼翠間登臨縱目千山連  
峯帷暮掩西嶺月把酒曉挹峩峩天搗來催程赴日  
下山靈應笑奔塵綠草堂風色定不改特乞好手圖  
林泉輕風縈江天漠漠微雲入樹山娟娟林亭石室  
互虧蔽畫中彷彿桃花源仙京師八月秋氣鮮高槐雜  
樹鳴涼蟬明窻晝靜拂絹素對之如泛書畫船我思

羅江縣志

卷七

八

茲園歷已久前人作室基開先當時經營手澤在詩  
篇幾處曾題鐫龍門晉謁今幾年古杭風月吳山偏  
墓田旋見生宿草西望蜀道悲啼鵲安得驅車來古  
綿相從鄴架披遺編興來更着上山屐高巖一枕松  
風眠

調元題醒園圖有感六首車家山下老農夫走上長  
安十二衢昨夜鄉愁眠不得呼燈起看醒園圖自分  
途窮命裏該君平不必太驚猜虎頭不是封侯相欸  
段他時歸去來每到花開躑躅頻故山不見與誰春  
生憎一幅桃源畫付與漁郎去問津再向天涯理客

衣回頭三十九年非蓉溪春色花如錦不爲蓴鱸也  
合歸煩惱詩人二月天長安買醉日高眠不須怪我  
朝奈懶夢裏醒園只枕邊故山茅屋傍雲龍欲寄新  
詩再拆封寄語兒童牆角外明年添種幾株松

醒園梨樹最多青黃二種約二百株皆先君手植

調元梨園遺興二首笑對青山曲未終倚樓閒看打  
魚翁歸來只在梨園坐看破繁華總是空生涯酷似  
李崆峒投老閒居杜鄩中習氣未除身尙健自敲檀  
板課歌僮

石刻

天然牀大如廣廈璽瓏剔透擅一園之勝卽先君石亭

羅江縣志

卷七

九

公箭亭所坐牀也臨江露置風日無損遊者皆登焉

調元詩序云天然牀古栢根也昔先君應羅江令楊  
古華聘請修奎星閣取材於東山有栢高二千尺大  
四十圍霜皮溜雨不知爲何代物中梓人選因伐之  
以其身爲棟而棄其根爲薪先君惜之謂古華曰此  
可斲爲牀也遂欣然送之掘及九仞乃得傭百夫撐  
之溯江昇至醒園除其沙礫剝之剔之稍加修飾椳  
杙蟠結百竅璽瓏盡作龍鳳龜蛇之狀截而平其頂  
登之能容八人可坐可眠有若生成故曰天然牀其  
廣一間屋不能容故置於箭道以茹亭覆之率爲風

雨所拔然根堅於鐵故雖風日亦不能剝蝕也因於  
臨江安置作歌以記之云綿州奎閣齊雲霞建者楊  
侯字古華當時伐木十選一兩川斫盡仍三巴就中  
先子實首事古栢輪困半封記忽與楊侯登東山黛  
色參天互驚視細者爲楠大者宋乃惜其根乞作牀  
自從撐至醒園後夜夜玉衡星有光斲成縱橫皆一  
丈龍鳳龜蛇形各像大牙相錯虬文蟠畧加修飾非  
由匠不須簣第不須茵磨洗瑩如楚簞勻涼天若徙  
北窓卧清風定認羲皇人我聞牀以栢爲貴素栢蹙  
栢皆稱異何況人棄我取之資費無多豈非瑞所怪

羅江縣志

卷七

十

直局脚微分釘爭金鐵前朝聞莫教又夢玉堂去夜  
中催撰牀婆文嗟余須髮雖未皓歸來宦興跡如埽  
安得此牀化黃楊高枕吾廬睡無蚤琉璃瑤猶不  
題况又萊杞與管蔡惟此先人手澤在堪與青蓮七  
寶齊不願跣趺不願坐但願醉來此間卧不妨露頂  
看青天一任浮雲太虛過

由醒園左手而下卽康家壩也縣北三十里有觀音巖  
調元觀音巖重修大殿記觀音巖本名白石巖在北  
鄉三十里之康家壩前此未有觀音之名也乾隆辛  
酉秋驟雨淋漓山崩石裂雷轟電擊忽從霹靂光中



而觀音石像出焉是月先君石亭公卽中鄉試三十  
六名附近居隣皆以爲神遂以名巖遠近禱者有求  
輒應以是通都大邑輻輳而來而每逢二月十九日  
爲觀音誕辰乞靈報賽者畢聚此日爲之酌神演劇  
其會之大幾與二月初三七曲山梓潼會等蓋綿州  
之第一禪林也顧巖逼巨石峭壁插天建殿不易從  
前開山和尚祥喜嵌巖建置大殿添設東廊閱旣久  
飛瓦墮落殿頗損壞今年七月天雨連綿山水陡發  
巖爲崩裂遂將大殿壓倒兩間而東廊亦傾圮其半  
道姑趙復坤念無以安神居也爲之惻然思重修之

更建玉皇樓於三層之上而力薄不逮不無望於十  
方之施主爲之請序於余以倡之余思觀音之神起  
於南海顯於西蜀化七十又二之身無不曾照遍三  
千有奇之國共荷慈悲而獨顯靈於吾土此尤居民  
之太幸也求福者神無不報之矣而顧使神居不妥  
可乎乾隆五十二年冬月上浣記

調元遊觀音巖何年霹靂擊鐵壁混沌乾坤忽中裂  
風雨號呼山爲搖普陀飛賜一靈石從此文運吾家  
開聯翩三鳳齊飛來天荒畢竟須天破五丁終不如  
五雷

鵲鶴寺縣北二十五里余舊讀書處

調元試畢復歸鵲鶴寺詩歸山重掃舊書床一路寒  
山木葉黃游浙有師皆老宿歸川無試不高庠滿窓

已見蛛懸網翻益先看鼠自忙一秀才回詩亦貴吟

箋纔寫有人藏補歲考例附三等時亦附高等  
學臺有三年始見一秀才之語

金頂山縣北二十八里頂有古松元明間物也

李化楠詠金頂古松詩天上何人下碧霄千年怪叟  
在山腰雲爲翠蓋身全露風撼蒼枝影不搖老鍊龍  
鱗經歲月長揮塵尾絕塵囂幾回佇立江干望滿耳

秋濤早晚潮

羅江縣志

卷七

三

調元雨中望金頂山詩一山孤立衆仙宗盤繞青螺  
萬萬重雲裏長疑披絮帽雨中偏似着輕容人言海  
內無三島我道村中第一峯倚得孤松喚金頂問他  
可也受秦封

馮家紫月峯山縣北三十里有文昌宮人稱上梓潼以  
南村爲中梓潼圍堆爲下梓潼相去俱七八里每年二  
月初三文昌誕日三處並賽士女奔覩焉

李化楠重修月峯梓潼宮碑記馮家紫有山日月峯  
在羅江縣北三十里雙巒特出峭壁嶙峋攝衣而上  
登其巔則河村南村之烟戶歷歷可數焉蓋一邑文

風所薈萃也上有文昌宮爲士子瞻拜之所創造不知何時明末兵亂委於灰燼有志者議修之不果康熙壬午庠生范延湄刈草爲菴讀書其中慨聖靈之未妥文教之未光乃與明經陳君獻三招募衆財莊巖聖像兼修樂樓一座迄於今數十年矣風雨漂搖木朽蠹生加以乞兒輩盤踞於中日散夜聚或拆毀墻壁或污穢殿庭以致愈加荒涼陳君目擊心惻以爲坐觀其敗罪將有歸爰倡首刻日鳩工重修去其朽腐易以良材又於正殿旁接修偏房二所前修拜亭三楹亭下砌石爲臺中置一門懸於巖畔以時啟

閉擇醇良者鑰之遂煥然爲兩村之冠焉是役也始自庚午冬越辛未夏不一年而成其間之募衆捐貲者固多而陳氏之父子祖孫宣力爲尤多帝君之靈從此其永安矣而今而後將使兩村之人以時瞻拜入門生敬追維孝友之訓益深報本之思當必有魁梧傑出之人以爲文教先是又山靈之秀氣所鍾而亦卽帝君之仁澤所覆育於無已者也

由醒園右手而下卽團堆壩河也有文昌宮人呼爲下梓潼在縣北三十里

調元二月三日至團堆壩文昌宮觀劇見葉贊之天

相毛殿颺德純兩秀才携尊而至歡飲至暮

故友携尊枉駕過一龕同佛聽笙歌君能有酒謀諸

婦我喜無殺得刺婆蜀人謂鱸為刺婆魚古寺僧稀松葉少戲

場人散蔗皮多甘蔗冬窖春賣兒婦尤喜噉之戲場為甚多嚼其汁而棄其皮與渣焉

十年不到團堆壩白髮看看奈老何

又五里有寶豐寺有牛王會

又八里至南村東山有東嶽廟皆明初所建

羅江縣志卷八

邑人李調元雨村稿

北鄉下

龍神堂前明時古刹也在縣北三十里南村壩

已卯偕周尤廷士拔遊龍神堂並序尤廷德陽縣令周明府際虞次君也明府豐潤辛酉孝廉與先君同年去歲曾邀余至署為太夫人書七十壽屏故遣子來謝尤廷尙未弱冠少余一歲詩文敏捷非凡器也留連數日遍遊南村龍神堂諸寺得詩二首奉贈云禪林何處足堪投除却龍神少可遊花被客蟠根盡

羅江縣志卷八

一

出竹儲人看笋長留不妨對佛同流酸且喜因僧得酒筍可惜栢松官取盡荒山未便挽賢騶君家豐潤我羅江萬里相逢意便降敢謂文人今有二從來國士定無雙翩翩真是佳公子濯濯來過淺陋邦不  
是蜚吟無好句龍文已讓鼎先扛士拔後中進士為滋陽令

斷碑

博 士 邑 邑 邑 邑 人 人 人 人 源溪張 勳隸額  
博 士 邑 邑 邑 邑 人 人 人 人 竹溪冉廷 恩書丹  
博 士 邑 邑 邑 邑 人 人 人 人 竹軒丁 校正  
博 士 邑 邑 邑 邑 人 人 人 人 栢山何永貞 撰文  
□得龍神容像殊為靈感土人迄今日為龍神堂  
傳冠徒之諱法興者即其兄之孫繼興而徒則今  
官氏子法□中餘自萬歷乙酉冬以別□□□□□  
業歸自綿竹中清山道經小憩則見□□□□□□□

按乾隆五十六年龍神堂住持寂慧掘出斷碑半邊文字剝蝕可識者謹一百二字存之可以知創建年月孫徒法嗣及龍神堂所由名

龍神堂古名觀音寺

李化楠觀音寺補修碑記烈士殉名貪夫殉財名可殉而財不可殉也近世殉名者寡而殉財者衆此在人情類然而錙流爲特甚余嘗論釋子能參禪悟道吐棄一切者上也其次則不貪利不惜勞苦補修寺院期於有成次也若逐逐於膾腥之場與庸夫俗子爭多較寡風斯下矣觀音寺僧如永本平池僧教洪

羅江縣志

卷八

二

法嗣因地屢易住持禪宇廢壞墻垣坍塌左右檀越目極不忍爰商同衆姓延請如永與其徒常文居住永自到寺至今中間不過十年而西廊之朽者重新東廊及前殿之圯者改換山門三間禪房一所買水田三十二畝添供香火築磚墻週圍塑靈官於門樓栽竹栢於隙地今又改造正殿另塑大佛三尊凡此如永師徒自爲捐貲修建並未叩及十方也寺自兵火後妙空禪師勅於康熙初年其後三傳而絕安縣僧如善繼居之募建西廊不再傳而亦絕非永師徒相繼鼎新則妙空禪師所建造幾何不復化爲灰燼

耶吾聞有不世之功者必享非常之報今如永之建  
豎如此子孫自此其興乎抑亦可以愧僧之貪利而  
不饜垂死訖無一成者也

龍神堂有文昌宮先君石亭公新建人呼中梓潼額有  
文教光華四字余童子時書

李化楠新建文昌宮碑記文昌之宿在奎璧之次主  
文柄而帝君之尊配武曲厥祀遍天下於吾蜀尤謹  
蓋靈異之跡明而爲人幽而爲神切近昭著俱可徵  
信者莫茲土若也羅江距梓潼不出二百里以實沈  
主參臺駘主汾之義例之則山川星辰民所瞻仰於

羅江縣志

卷八

三

是焉在又非止文字之行世若水之行地無往不在  
宜人人不忘其所宗主而已也羅江縣北之三十里  
曰河村有山名月峯上起文昌宮而余之家在南村  
與河村隔一水當二月三日帝君降誕則兩村之人  
及附近各村並走相與焚香祝獻優伶歌舞以爲樂  
辛未之春南村人與本村得所爲龍神堂者中有聖  
像一尊第渺小乃思斤其楹而新之改故像而大之  
旁爲天龕爲地啞余需次家居實贊其謀其夏卽上  
京謁選至壬申三月而落成龍神廟者取其址而已  
鳩工伐木棟楹梁檻皆更爲之墻垣門戶極堅好四

壁圖畫煥發精采又雕刻神龕一座神像裝設俱如  
創始所謀者合前後所費共八十餘金皆出衆力所  
贊襄自是凡遇會遂不必更至河村而自成南村一  
勝地余惟文昌尊神一方文運所關不厭家祀戶祝  
又况吾鄉第願鄉之人嫻於帝君孝友訓以事其父  
兄以教其子弟歲時祠祀進退雍容都雅無長其豈  
凌好勝之習以漸進於敦龐而又嚴爲戒飭求所以  
有始終者是則可書也已

又文昌宮惜字宮告成賦十五韻代序奇偶起文字  
書契易結繩爾光浮蠹簡栗尾染溪藤象形並會意

羅江縣志

卷八

四

聲音點畫增五經昭雲漢六書寶光凝大道於斯在  
斯文所由興何乃世間人曾不知欽承踐踏及拋棄  
相習以爲恒不知聖人典曷觀奉佛僧盥手誦經文  
齋沐常服膺殘編與故紙珍惜凜戰兢誰歟計及此  
劉子一念興家弟與之借石宮起七層其光看射斗  
火色上飛騰是字皆可惜無曰我不能君子求多福  
多壽亦其徵

同善橋在南村李家灣東

又同善橋碑記善可同也不可獨也蓋獨則私同則  
公獨則難爲同則易舉凡爲善者皆然也而橋爲尤



著吾鄉素號醇謹父老子弟敦朴有古風數年來于路之崎嶇者靡不治橋之傾圮者靡不修獨此地需橋孔亟而闕焉不舉非人心不同亦事必以漸也甲子冬吾鄉人一念經營衆志成孚諏吉鳩工閱兩月而告竣予惟世之有財者多矣然往往慳囊難破卽或間有施捨亦多惑於浮屠又或共爲一事二三其見築室道謀不能度德比義以相勉於善孰若吾鄉之除道成梁不容已贊而衆人一心者乎雖然橋者善之一端也由是而推廣之以幾於風清俗美型仁講讓不獨父其父子其子而後謂之大同吾鄉之人其不以此自足而共勗于道以永守此同善之風也是則吾之所禱也夫

月波橋在南村李家灣西

又月波橋碑記南村有水源出蔣公堰在象鼻山張家堰以達於劉家河蓋里人之所資以灌田也水之支流汊港甚多而居其中可以作堰宜洩者則曰大溝溝濶不可踰而潴水之處又甚深非蹇裳可濟舊有二橋久不治里人謀所以新之共解囊鳩工始戊寅冬迄今年夏而二橋成橋之左右凡係小水之處如所謂支流汊港者俱架石焉蓋舉其大不遺其細

詩曰履道坦坦不信然歟其一橋在龍神堂前舊名飛龍今仍之其一橋初未有名今題曰月波蓋水勢蜿蜒如龍其環抱之處形如半月故曰月波云

南村前有別業名曰困園前有小西湖

調元小西湖初成並序云余在通鑑館每日思歸遂見之夢夢中輒見南村屋左有荷花池池中樓臺掩映醒問自川來者皆以爲田然不夢則已夢則如是余心度曰得勿使化田爲湖後半生居於是乎果爾得歸當成吾志自是不夢今名小西湖遂初志也內鑿方塘外鑿堤一朝鑿破夢中迷不寐便有菰蒲長

羅江縣志

卷八

六

纔種旋看竹樹齊十畝肥饒化魚鼈自年浮沒任鳧鷖更移紅白新繁藕要當西湖在屋西

又困園雜詠四首困園初築亦悠然地狹偏能結構堅疊石爲山全種竹穿池引水半栽蓮拈花偶笑人稱佛戴笠行吟自謂仙曾到名山遊脚倦此生只合老丹鉛 獨坐園林百不思細觀物理識安危鳥巢密樹飛方覺魚在深淵躍始知甕面常留親漉酒案頭時有自圖詩本非畢卓何妨醉莫怪長年獨把卮

老來意氣尙縱橫指點前賢入品評未許陶潛稱酒隱肯教杜甫占詩名好官市上優兼備佳客門中

弟與兄看透世情惟冷眼知予不是不平鳴 一年  
一度出遊遨多所枝梧少所遭題壁草書驚太怪逢  
場作戲詫猶豪不能酒却常求醉畧解棋偏自詡高  
漢帖唐碑是知己歸來何惜校讐勞

署州尊潘邦和認齋見訪南村敝廬四首琴鶴貽謀  
遠雲龍望氣佳几筵新涕淚遊鈎舊生涯草色青迷  
路苔痕綠上階高臺瞰四極秋意澹人懷 已陟萬  
松嶺還登萬卷樓泰山兼土壤淵海納川流滴露晨  
光起然藜夜未休古香如可挹欲去更夷猶 才疎  
餘短髮祿薄仗長撓自信心常逸人嫌骨本凡問奇

羅江縣志

卷八

七

探奧窈學語仰雕鐫勿屏門墻外因風惠一緘 座  
上客俱醉園中人獨醒鷄羣常混迹魚服欲潛形潺  
水升卿月京門頌福星 主恩不遺舊名已貯金瓶  
車家山在南村本宅後縣北三十里調元父母墓在焉  
不塋扁擔灣者遵父命也

先君誥封奉政大夫順天府北路同知石亭李公墓誌  
銘

羅江在四川成都府之東北境 本朝百餘年來儲  
英毓秀登甲榜者自今順天府北路 同知石亭李公  
始公未弱冠爲名諸生試輒利辛酉 膺選拔登賢書

壬戌捷南宮後二十年公長子調元繼之甲第蟬聯  
爲羅江勝事矣顧嘗綜公平生始爲名儒後爲循吏  
有不徒以科名貴者初公考克咸安宮教習不就  
歸遠近學者多宗之及辛未之官浙江癸酉補餘姚  
令姚邑賦重民頑奸究出沒公親督搜捕創立枉生  
所捐俸給食局使目新擇執藝人爲之師量所執大  
小暫借官錢資之藝旣成乃保釋之使自謀其生人  
咸悔悟終身不復作賊值歲歉公先期稽審戶口實  
數以備賑卹上官入境爲口講手畫某里某甲如數  
指上文無苗髮爽丙子調秀水移署平湖積案三千

羅江縣志

卷八

八

有奇公自立程限每日分晨午申三時訊之時各數  
事三月盡理令洞開門庭任人觀聽有未愜衆心者  
咨詢得實立時更定先是乍浦多賊公至捐俸設局  
教之藝如餘姚之法甫兩月復秀水任民間有七年  
雲烟兩月青天之謠巡撫楊公廷璋諭公循卓以知  
府薦尋丁父憂庚辰進秩司馬署滄州牧州爲四方  
盜逃淵藪公嚴保甲法稽覈部內丁男年貌按冊搜  
索鮮脫者改署涿州州方患旱得旨賑卹公嚴胥  
吏侵飽捐俸煮粥加賑民賴以安癸未補天津府海  
防同知抵任復憂歸丙戌署霸冀兩州牧丁亥補宣

化府同知駐新保安境亦多盜立查更法以小紅旗  
三十二半爲守旗半爲望旗初昏給邏卒守旗夜分  
更給望旗天明必以望旗驗傳析中宵不輟由是好  
究屏路戊子調順天府北路同知兼署密雲事值有  
冤獄公會讞得情將力雪之是時天子秋獮於木  
蘭行在樞府以徵來提勘留不發幾挂吏議旋經  
寬免上廻蹕時日公于道左曰爾爲李化楠否可  
謂強項令矣其有定識定力守正不屈如此公爲人  
狀貌雄偉氣度豁達勇于赴公爲政寬猛相濟然一  
以愛民爲主不輕勾攝曰堂上一點硃民間一滴血

所在約束吏役維嚴公事或需車驢應以吏役家所  
有而厚償其值緝則不藉捕役令鄉保里正報所知  
者擒送簪花詒樂以旌之讞獄不事刑求使盡其情  
虛衷以聽之精算法凡丈量倉儲彈指間盡得其數  
性介澀絕嚮遺一如浼每監視鄰境工程粒粟不擾家  
人亦不受一錢其在浙之餘姚也兩充壬申丙子鄉  
試同考官立姚江書院延壬申所得士李君祖憲爲  
山長李故宿學馳聲文玷者五十年得出公門冠榜  
首人咸服公之精鑑平生孝友任卹力於爲善期積  
一累萬顏其居曰萬善堂每曰白日莫閒過必多作

有益之事庶不負此光陰耳喜藏書以川中書少購諸江浙航于家爲樓貯之曰此吾宦囊也工吟咏熟韓蘓全集覆按不失一字善騎射設塚百步外每發必中家居亦習射于圃曰此運筦意也公子調元與誥同舉春官嘗述公少時承庭訓極嚴不當意輒使之耕不令入塾耕少惰卽投以瓦礫以故公頷有傷痕而公仍私挾策于隴上據高阜而哦乃使卒業又垂髫時與羣兒戲公自爲官兩兒設爲兩造有狡黠不以理訴者變色扑之羣兒卒輸情受杖而去識者知公他日必爲名儒爲循吏今公之歿也以痰疾陡

羅江縣志

卷八

十

作翁卒不能救抱長材而未竟所用良可哀也已公姓李氏名化楠字廷節號石亭有名厚者始卜居羅江縣之南村壩爲公會祖祖名攀旺父名文彩並以公貴贈文林郎浙江秀水縣知縣妣俱儒人文彩生三子次化榎監生化樟諸生公其長也生於康熙五十二年閏六月十四日午時卒於乾隆三十二年十二月三十日卯時享年五十有七原娶羅以子調元貴贈恭人繼娶吳封恭人子三長卽調元癸未進士由內閣中書補國子監學錄翰林院庶吉士吏部文選司主事次譚元國學生次聲元爲化榎後孫二朝

礎朝臻女二人孫女三諸孤于公歿之明年奉喪歸川又閱廿年長君以歷任廣東主考學政直隸通水道歸乃克卜塋于車家山之陽命其弟太史李鼎元以狀來屬誥文其壙石納諸幽而系以銘曰育民以仁如穀斯活植民以義如莠斯拔應卒彌裕任重不折轉石志堅餘泉品潔書澤遺愛銘詞徵實佳城千祀永保貞吉 賜進士出身誥授光祿大夫經筵講官戶部尙書協辦大學士總理刑部事軍機大臣年眷姪富陽董誥頓首拜撰

羅恭人墓在桑家巷西去縣北三十里有墓誌銘

羅江縣志

卷八

十一

羅恭人係誥封中憲大夫順天府北路同知石亭李君元配也父兆鰲世爲羅望族石亭父英華君以羅本髫齡交又衡宇相望稔知恭人賢淑遂委禽焉時李君爲德陽諸生以貧乏多館於外後又改設爲羅江縣爲邑令上元王嘉會明府所器延至署教其子而親授以科舉文故數載不歸恭人事舅姑輒以一身兼子婦職凡井臼操作無不備極辛勤至今人稱其孝並無閒言卒時享年二十八姊妹二人母居長二姨爲國子生冉子建之妻卽舉人冉玉嘉之祖母也卒時長君調元方六歲止有一妹甫三歲乳名蘭

伶仃孤苦毫無知識嗚呼可哀也已後二十歲長君始舉己卯賢書癸未成進士改庶吉士授吏部主事陞員外郎兼翰林院編修提督廣東學政乃得封贈焚黃焉閱二年爲直隸通永道相晤於京乃求銘於余有子如是恭人可謂不死矣恭人生於康熙壬辰年六月初六日辰時卒於乾隆己未年九月二十五日亥時塋於後山之陽乃爲之銘曰煌煌世閥奕奕儒門懷珠蘊玉篤啟後昆巍巍兆宅矗立南村蒼松翠栢霞護雲屯綿綿科甲世應代興 賜進士出身誥授光祿大夫經筵講官戶部尚書協辦大學士

羅江縣志

卷八

三

總理刑部事軍機大臣年眷姪富陽董誥頓首拜撰象鼻紫五顯廟

調元五顯廟記五顯之名佛典以爲華光菩薩所化然不見於儒書惟明祝允明所著集畧有五顯記引祖殿靈應集言與天地同本始逮唐光啟降於婺源王瑜家言當血食於此於是建宇棲之宋大觀以後累封王秩宣和始封五顯迺功郎胡升作星源志則疑會要不載而推本於五行五行者象於天爲五緯形於地爲五物麗於人爲五德又名五帝卽所謂太昊炎帝少帝嚳黃帝其神卽勾芒祝融蓐收玄冥后



土也小宗伯既兆五帝於四郊後人又爲五專祠於世殆此義歟論頗近雅據此則五顯正神其來舊矣南村上流湔江有山迤邐而來直挿江濤曰象鼻觜厓上舊有五顯廟未知何代頽廢嘉慶元年二月綿竹民某患瘵病百醫不治有雲遊道人於袖中探一紅丸使吞之曰得此可除依方服之果痊以金帛謝之不受問其姓曰蕭問其居曰象鼻觜後至山下訪之遍問無姓蕭者有父老沉吟久之謂某曰兒時曾聞祖父言山舊有五顯廟曾覽三教源流五父爲蕭永福一胎五子俱以顯爲派以聰明正直德爲名

羅江縣志

卷八

十三

而顯德居五尤著靈異能降妖安民故後人祀之其始是歟某乃登山遍閱見有小土廟以笏卜之其應如嚮遂捐金立廟而並塑觀音像於中據此則五顯非虛也故記之

象鼻觜在縣北四十里有餘慶橋 交安縣界

李化楠餘慶橋碑記善不足以濟則非善願以一人濟衆人其勢將立窮而以衆人濟衆人其事恒易舉古者杠梁之設督之在官歲一新之以便斯民然而窮鄉僻壤山巔水涯非能一一而杠之梁之也故以民勸民而梁之成也忽焉凡以斲有濟而已象鼻觜

者綿安接壤也北走神泉南通紋水往來行人絡繹不絕中有一澗雖非巨流而自夏徂秋河水泛溢拍舟子而無從欲褰裳而莫濟隔岸相呼不無咫尺天涯之恨甲子歲吾鄉人侯等一念經營首倡盛舉募衆捐貲架以石橋是役也費約百金工匠一年自今告成以後履道坦坦乘輿者有按轡徐行之樂徒步者無淺深厲揭之艱濟之衆矣善莫大焉易曰積善之家必有所餘慶吾知諸君子之好善必有以獲其祥矣故以餘慶名橋而爲之記

石亭文集

象鼻觜地居羅江縣上流凡縣中之田皆資灌溉

羅江縣志

卷八

十四

淨水本郭家溝山溪小水縣民跨水作羅漢場下流入中江名淨江東北由龍安之石泉縣三面山發源名龍安水東流入安縣境由臭水河至塔水橋經彰明縣境至縣北二里許北寺前與瀾水合流雲龍堰易家堰全子堰皆淨水也

馬家場有野壩堰縣北四十里上接安縣大河水灌河村壩田五千三百畝

蔣公水有堰引水灌南村壩田二千畝零

毛家水有堰縣北三十里自象鼻觜下流過河南一村

灌毛家壩田

以上俱舊縣志

南村有寶林寺寺有仙人掌鐵幹森梢開花如芙蓉

羅江縣志

卷八

羅江縣志卷九

邑人李調元兩村稿

人物 有傳三人

明羅江舉人 一 雍原 永樂甲午

二 陳良翰 宏治甲子

三 高 節 正德辛卯

四 吳 瑛 正德丁卯

五 鄭 泗 嘉靖癸卯

明羅江進士 一 陳良翰 宏治十八年乙丑顧鼎臣榜

高 節 嘉靖十一年壬辰林大欽榜題名 碑載羅江民籍有傳

羅江縣志 卷九

高節綿州羅江人 見題名碑 簡弟嘉靖十一年壬辰進士及

第第三人授編修署員外郎三十三年甲辰命太子賓

客禮部尚書兼翰林院學士張潮左春坊左庶子江汝

璧為考試官以節與修撰茅瓚編修沈坤彭鳳歐陽順

等同充房考時潮入貢院三場畢以病死考試惟江一

人而後序則屬同考修撰茅瓚是歲取中瞿景淳等廷

試賜秦鳴雷瞿景淳吳情及第而少傅翟鑾二子汝儉

汝孝俱與焉少傅以嫌故辭讀卷不許既試以進卷呈

上上疑汝儉等在首甲因抑第一卷至第三復抑第三

卷置二甲第四折卷果汝孝也刑科給事中汪蛟王堯

日論劾少詹事江汝璧修撰沈坤編修彭鳳歐陽暉署  
員外郎高節朋私通賄大壞制科大學士翟鑾以內閣  
首臣二子汝儉汝孝既連中鄉試又連中會試若持券  
取物然崔奇勲乃汝儉等師焦清與汝儉結媼又同受  
業四人者會試俱一號汝儉汝孝奇勲皆彭鳳所取詩  
同考官五人何俱在鳳一房歐陽暉亦汝儉等師本同  
經又改看書經跡若引嫌而陰助鳳尋卷及沈坤之取  
中陸燾高節之取中彭謙汪一中皆以納賄故有一鑾  
當道雙鳳齊鳴之謠乞明正其辜且欲追順天鄉試主  
考秦鳴夏蒲應麒阿奉翟鑾之罪上下其意吏部都察

羅江縣志

卷九

二

院從公參看鑾隨具疏自理且請特降題目命部院大  
臣覆試上怒曰鑾被劾有旨參看乃不候處分肆行擾  
辨屢屢以真無假爲辭同夏言禁坐轎止罪一人全不  
感懼敢以撰科文贊元修爲欺朕內閣任重不早赴以  
朕不早朝並君行事二子縱有軾轍之才豈可分明並  
用恣肆放僻如此部院其參閱治罪不許回護部院覆  
請下汝璧于理嚴究分別情罪輕重上以跡弊明顯大  
壞祖宗取士之制遂勒鑾並汝儉汝孝奇勲清及鳳暉  
俱爲民汝璧等俱下鎮撫司逮問已法司會訊謂汝璧  
鳴夏應奇雖各阿取輔臣之子然實非賄故坤之取燾

節之取一中亦然獨彭謙實以校尉張岳賄五百金而  
中監察御史王珩沈越失於糾察罪亦難逃疏上詔杖  
汝璧鳴夏應麒六十革職閒住永不敘用珩越降一級  
調外任節岳充軍謙爲民坤一中焯存留供職出弁州別集科  
試初嚴嵩之入閣也鑿以資格居其上權遠出嵩下不  
平而嵩終惡鑿不能容御史趙大佑劾鑿私同年吏部  
尙書許讚亦發鑿請屬私書帝皆不問會鑿子汝儉汝  
孝連捷鄉試會場嵩屬汪蛟王堯日劾其有弊鑿遂獲  
罪見史翟明鑿傳而節亦牽入嵩所屬劾中遂敗

贊曰明世綿州三高齊名皆以文章著科名亦相埒而

羅江縣志

卷九

三

出處畧異高第以詩人自命恬退自得嚼然不污可謂  
明哲保身矣高簡雖廷杖遭謫旋復起用亦以晚節自  
修惟節以鼎甲開吾羅爲明三百年所未有然竟以科  
場事充軍資志以沒衆論惜之然當嚴嵩撓權之時朝  
紳無不受其屠毒其事起於嵩傾翟鑿而牽連被害則  
其不附嵩可知矣受賄之事莫必其有無得無亦如魏  
忠賢誣熊廷弼行賄以陷楊左諸清流乎小人之害君  
子何所不至識者察其原委而諒其心可也

童山文集

嘉靖壬辰科是年館選凡兩度以後選者改入平湖人  
王梅前後皆與焉凡二十一人館元爲呂懷碑作恒建

拜給事蓋用前二科袁表唐順之例末名兩度俱郭希顏反留為史官時留者七人而主事至九人皆首揆永嘉意也首甲狀元林大欽年二十二授官尋以酒色亡第二孔天胤以王親出為提學僉事終於外僚第三高節授編修而不免遣戍其吉士中受極刑者二人一為胡守中其一即郭希顏野獲編

本朝舉人 一 余昌宗 順治庚子 十 曾世 愷嘉慶丁卯

二 李化楠 乾隆辛酉

三 李調元 乾隆己卯

四 錢林虎 乾隆庚辰

羅江縣志 卷九

五 柴邦直 乾隆乙酉 浙江仁和籍

六 劉清 乾隆戊子

七 李鼎元 乾隆庚寅

八 李驥元 乾隆丁酉

九 李本元 乾隆丙午

十 曾昌曙 乾隆己酉

十一 李朝塏 乾隆乙卯

十二 冉玉嘉 二十 楊上珍 俱嘉慶庚申

十三 余人鳳 嘉慶辛酉

本朝進士 李化楠 乾隆七年壬戌 金牲榜有傳

李化楠字廷節號石亭羅江人乾隆辛酉選拔鄉試壬戌進士狀貌魁梧奇偉分發浙江巡撫黃廷璋一見卽器之謂司道曰此將來浙中第一循良也以是上官俱眡目癸酉補浙江餘姚縣令姚邑濱海自上林至闌風七鄉通錢塘橫亘八九十里時有海潮爲患十五年秋七月颶風挾雨大作吹瓦拔木三晝夜不止公戰慄跪庭中祝曰海地窮民甫離災難若天不降康堤潰水溢民其爲魚水旱頻仍罪在長吏願身受罰爲此地民暫延殘喘祝畢卽分役查看水勢天明廟山巡檢俞連馳報水幾潰隄賴東南風大作潮竟不至人皆以爲公至

羅江縣志

卷九

五

誠所感云姚邑賦重民頑爲盜賊出沒之藪公銳意廓清懸賞格追比一時小賊多擒而巨猾依然漏網因思緝權不可專委捕快因密錄難獲猾賊四五人名於票夜喚皂隸李兆民壯婁恩至署出票袖中面諭之曰賊某等現藏某所爾若依限獲受上賞否則革役二役唯唯退不三日積賊景三擒至內外無知者又十餘日逸賊張子顯張文紹陸通儒鄒士元繆允年孫善平等先後就擒審出屢次行竊及賄囑勢豪州同楊某串捕庇縱各實情通詳分別軍流抵罪重賞兆恩二役合邑驚以爲神乃將小賊創立枉生所捐俸給食扁使自新擇



執藝人爲之師量所執大小暫借官錢資之藝旣成乃保釋之人咸感悔終身不復作賊丙子調秀水移署平湖前令積案三千有奇公自立程限每日分辰午申三時訊之時各數事二月盡理去之日平湖民送者萬人頂香跪道以灰塗壁寫七年如雲烟兩月見青天二旬大街小巷皆然七年謂前任平湖令瞿天翹也楊公廷璋諭公循卓以知府薦尋丁父憂庚辰服闋進秩司馬署滄州牧州爲四方盜淵藪公嚴保甲法稽覈部內丁男年貌按冊搜索鮮有脫者署涿州州方患旱公捐俸煮粥加賑民賴以安癸未補天津海方同知抵任復

以憂歸丙戌署霸冀兩州牧丁亥補宣化府同知駐新保安境亦多盜立查更法由是奸宄屏跡戊子授順天府北路同知兼署密雲縣事是時京師奸人剪辮髮者蔓延數省無佐證北路有張乙者爲警人誣告公知其冤而 行在慮囚甚急公以獄讞未定拒不發已挂吏議旋經大臣察其實奏請寬免事始解 上行圍木蘭公葡伏道旁 上笑謂扈駕諸臣曰這個大漢可謂強項矣人謂上有嚮用意卽大府益倚重公密雲令任某以事被劾公讞得實矣有齟齬公者力持之而公素肥碩令浙時爽常上迷至是又患怔忡祀竈日以事過都

門購參餌自隨越二日入會城命從者瀹茶忽解所佩  
刃自傷茶至從者驚相呼公躍然起曰吾安得血被手  
耶創未深然亦竟不治聞者皆詫嘆後任某卒以職置  
重法而力持者亦得罪戍邊衛以去人以是服公神明  
云著有萬善堂稿石亭集醒園錄子二長調元賜進士  
出身改庶吉士授吏部文選司主事甲午廣東副主考  
陞考功員外郎兼翰林院編修提督廣東學政誥封中  
憲大夫官至直隸通永道二譚元太學生

贊曰公以壬申校浙闈得沈君祖惠爲解首儒林多稱  
之要其獲上治民不愧古循吏矣疾由心作天若基之

羅江縣志

卷九

七

然君之沒未幾而忌君者旋以他事敗密雲獄亦卒如  
公所讞報固若斯不爽也抑亦可以無憾矣

年任侍郎  
吳省欽撰

調元字美堂號雨村十八歲補諸生卽隨先君浙江秀  
水任讀書因在籍食俸大司寇錢香樹先生家居金陀  
坊時至衙署先君呼出拜見以素所作詩文請質先生  
驚曰公子殆非蜀人乃吾浙人也可受業吾門吾當教  
之然吾門生多大老汝適以吾兒少寇汝誠爲師而呼  
余爲太老師可也自是在金陀坊受業一日見先生命  
諸公子擬作召試詩題春蠶作繭先生命同作調元得  
一聯云不梭還自織非彈却成圓先生閱之大喜曰此

名句也當爲諸卷之首又復批於卷曰憶昔十年前侍  
上于 乾清宮元宵聯句 上思如湧泉言言珠玉  
僕得一聯云風團謝家絮霜點洞庭橙一時王公大臣  
俱推僕爲五字長城固不敢當今見足下圓字一聯與  
前事堪印証也他年成進士入翰林聲名雀起予企望  
之從此以詩學受知於先生春風中盡丁丑一年明年  
戊寅隨先君以艱回蜀從此不獲侍左右然至今未嘗  
忘也又受知于提學洗馬史公屢試第一謂諸生日吾  
在蜀三年今始見一個秀才也卽日送入錦江書院肄  
業中已卯鄉試第五名辛巳由落卷取中內閣中書補

羅江縣志

卷九

八

國子監學錄癸未會試中第二名進士殿試第二甲第  
十一名改庶吉士散館授吏部主事考差第一充廣東  
副主考回陞考功員外郎丙申以議稿塗押爲同司所  
回舒爲先入所中填入浮躁引 見蒙 上詢及軍機  
傳吏部堂官明白回奏尙書武進相國程文恭公以畫  
稿塗押對 上曰司官有不安于心者向例原准不畫  
押如何便填大計程曰是 上問居官何如奏曰辦事  
勇往遂奉 旨着仍以員外郎用卽日到任 員外  
尙未補缺卽 命提督廣東學政三年任滿回京卽授  
直隸通永道召見勤政殿 上曰 汝乃朕提拔之人

也非朕乾剛獨斷倘在明朝汝能免權臣之害乎汝須  
謹記朕言在部數月 上嘗從容謂相國程文恭及侍  
郎袁清恪曰李調元能與舒阿爭稿頗有骨氣但性子  
不好須令改之乃終不自悛在道任甫二年又因參永  
平府爲府所傷遂罷職遣發伊犁以母老贖罪不作出  
山想後 上問弟鼎元李調元是汝何人蓋 聖恩猶  
在念也然時和方當國遊其門者成羣豫知冰山必敗  
不肯復謀補官遂毅然而歸豈知家居十八年冰山始  
敗可以報國而吾亦老矣以邊省之人而受 高廟  
特達之知如此其重誠爲千古罕有終不能勉力向上

羅江縣志

卷九

九

每一念及惟有淚潄潄而已聊書于此以示後世子孫  
世世以報國爲念無令我長抱終天之恨也

李鼎元字墨莊由廩生中庚寅鄉試戊戌會試殿試第  
三甲第一名進士改庶吉士散館授翰林院檢討改授  
內閣中書己未八月十九日 命李鼎元至琉球國借  
正使太湖趙文楷充冊封天使賜正一品麟蟒服庚申  
過海辛酉春回朝復 命陞宗人府主事

附鼎元琉球異夢記

詩有夢中得句者率多懞恍難解然竟有卒得其解  
者余弟墨莊戊午八月十九日奉 命冊封琉球紀

恩詩有廿年舊夢肯迷因句自注云甲辰九月以假遊浙夜夢過海作詩覺而忘之惟記有雲養淡螺深句頗自得意而未得其解余讀之亦覺茫然欲查典故而書樓已燒無可校正今年壬戌六月二十五日冉錫玉嘉自京回墨莊抄寄所作右旋白螺記云右旋白螺者西藏入貢供器也乾隆丁未春 上命大學士福康安勦臺匪林瑛文 賜此螺時余方在翰林修國史得恭讀 高宗純皇帝御製右旋白螺贊謂微物而能測天攜以過海吉祥安穩心竊誌之後數月捷音至言舟行往來順利此螺遂奉 旨留貯

羅江縣志

卷九

十

閩督署備渡海用嘉慶四年己未琉球國王尙溫以其祖尙穆喪來告請襲封例遣使余時官中書適在選八月十九日引見得 旨貳修撰趙文楷以行庚申二月出都四月抵閩中丞汪公志伊齋螺至云 皇上命督臣玉德奉許供奉封舟乃望 闕謝訖啓鑰審視螺長五寸六分參之數得天地之中和圓腹混沌象太極首尾各長二寸象兩儀旋四折而止象四象螺皆左旋此獨右者以陰承陽迎天行也膚嵌寶石八合八卦數色配之襲雲錦五重重一色取五行相生義所以養之也藏以金匱而無極之理備焉

蓋造物者生是非偶也先是乾隆甲辰余假歸九月四日泊舟溫城下夢航海樓船巨麗旗幟飛揚風浪拍天擊節爲詩醒記雲養淡螺深句並舟牌書免朝字舉以問人無知者以夢也置之及使命下檢同鄉海山先生琉球志畧封舟圖有免朝字已驚前夢驗豈復料白螺之命能使十七年夢中之句字字有着落哉五月七日自閩開洋十二日抵中山十月二十五日自中山開洋十一月朔日歸閩去來皆六日竊惟琉球自前明迄今冊使往來三十有餘次往往中流猝遇颶颶檣傾柁折甚者觸礁破舟此行獨邀

羅江縣志

卷九

十一

順利與福公後先一轍謂非白螺之神曷克致此五燈會元謂廣南有鎮海明珠者殆此螺之類歟並寄接到白螺恭紀二首卽以夢中句爲起句云雲養淡螺深居然夢可尋光華瞻日月靈異測陽陰定海風癡避降龍佛法欽波濤知不起止水是臣心雲養淡螺深光涵八寶沈財霞囊是錦捧日匱爲金已佐將軍績重煩聖主心不才叨異數何以靖微忱夢之足徵如此前因之說信不誣也誰謂不可解乎

兩村詩話

補遺

李驥元

乾隆甲辰殿試茹芬榜有傳

李驥元字其德號鳧塘羅江人生不好弄天性愛書甫四五歲見羣童入塾卽跟隨不回父香如尋歸問之則曰我亦欲讀父曰汝能識字乎對曰先生教彼認書我從旁聽之十已記其八矣試之果然父竒之遂留自課南村有龍神堂在大溝北中有文昌宮每年二月初三日誕會演劇闔村士女無不聚觀弟獨絕跡不出父憐其體弱恐勞瘁成疾詎令出觀不得已隨去隔溝而望仍挾一書且看且讀及父至劇場回視之則已回塾矣人皆以爲異時戊寅余隨先君自秀水丁祖妣艱歸先君命余在環翠軒課弟譚元而香如叔亦令鼎驥兩弟從

羅江縣志

卷九

三

學舉業惟弟年幼苦讀未弱冠而文已如成人然是年值羅江彙童滿擬縣覆居首未幾榜發則見驥一人回問之哽咽不言淚如雨下乃知首覆無名因慰之曰觀汝志氣如此必不久居人下也次年卽由縣州院連取三案首入庠學憲南漚吳冲之愛其文深器之弟初名繼公親筆改爲驥曰汝千里駒也勉之自是歲科屢試第一丁酉遂入選拔中鄉試第五名經魁余時亦提學廣東聞之喜曰此可繼先君及余之故步也次年戊戌又聞弟鼎元中進士以三甲第一名改庶吉士又喜曰此可繼余館選之故步也是科弟雖未第而鼎投館得

檢討家聲由是日起人皆榮之余曰未也須得編修乃  
慰我心耳必得者其在驥弟乎又三年余由廣東學政  
任滿回京補授直隸通永道因接二弟在署甲辰會試  
余與鼎住內城看榜見四川進士額止二名弟與巴縣  
張鏞與焉一時榜下譁然曰皆讀書種子也我輩第可  
無恨矣殿試二甲改庶吉士後三年散館竟得編修于  
是三翰林之名噪天下大總裁兵部尚書獻縣紀曉嵐  
先生謂諸王公曰吾今科所取皆讀書人而首推者實  
雨村之弟驥元也吾昔皆二甲未得編修今不缺矣成  
吾志者子也時香如叔亦自山東泰安令弟婦兄何人

羅江縣志

卷九

三

麟署聞信回京相見於通歡燕竟日余時亦將歸里臘  
月初五爲余誕辰弟曾作詩二首祝壽餞行送至葫蘆  
頭各灑淚而別丁未兩弟丁叔父艱始得回里相見然  
一自楚北來一自粵西來雖喪費稍支而萬里千山風  
塵碌碌已苦不可勝言矣居半年惟與父老閒話桑麻  
絕口不談溫室樹生平不喜應酬在京亦不多赴燕會來  
川典試編修溫汝适順德人爲會試同年榜後道過羅  
江見訪已行至祠堂蓋欲兼觀醒園也弟既不迎迓亦  
不脩餐溫悵然而去後吾弟聞之若不知也服闋至京  
此後遂與弟不復相見矣次年適值乙卯科各省鄉試



考差得頭等蒙 恩差與太常寺卿施朝幹充山東副  
主考回京復 命 召對稱 旨問家世甚悉 天顏  
大喜未幾卽陞左春坊左中允蓋超陞也人皆以爲  
簡在帝心不日將大用王公及掌院等交相薦舉戊午  
大考雖照例仍改編修每逢站班常被 顧問尤爲成  
親王所器賞是年二月二十三日奉 特旨派入 上  
書房行走除夕蒙 上賞賜貂皮等節物隨詣 公門  
叩謝已未年五月初三忽得咯血之疾始猶勉強上  
朝因誤服涼藥遂至不起蓋弟一生讀書之心血至此  
而盡雖身列清華而骨體已枯故臨死而猶不自知也

羅江縣志

卷九

十四

弟工於小楷每以趙子昂爲法作文簡古似韓柳尤工  
於詩立意學蘓數年前曾以鳧塘稿托余婿張玉溪寄  
余求序其詩亟爲少司寇王蘭泉先生所賞序成寄墨  
莊爲刊行不知刊成否弟天性孝友兄弟和睦從不聞  
家人生產故至今同居無閒童氏張氏生有二子長子  
五歲次二歲俱於弟卒後一年夭殤竟無子其存惟張  
氏所生一女而已弟生於乾隆乙亥年七月初二日寅  
時卒於嘉慶四年己未九月二十二日寅時年四十有  
五

贊曰昔王沂公夫婦積德無子每夜禱天願賜一愛讀

書子後夢神人送一子謂曰今以曾參爲汝子後生兒  
遂名曾今弟之好讀母亦天所賜歟雖非三元宰相而  
馳名翰苑幾二十年疊膺 帝眷可謂深矣乃年止中  
壽沒竟無子亦又何哉豈天能生之而不能成之歟抑  
其稟氣之厚薄有以使之然歟嗚呼天道無知真無知  
矣兄調元撰

本朝副榜 一 郭大有 乾隆辛酉

二 陳德 乾隆己亥 譚有容 嘉慶戊午

本朝拔貢 一 趙亮 雍正乙卯

二 李化楠 乾隆辛酉

羅江縣志 卷九

十五

三 李驥元 乾隆丁酉

四 計國成 乾隆己酉

本朝歲貢 一 嚴秉剛

二 陳註

三 范昂

四 陳策

五 石維嶽

六 陳格言

七 冉膺

八 謝周望

九計萬安

十計天禧

十一鞏建昌 十二李朝杰 恩貢

十三陸士彬 十四陳懷瑀

本朝武舉 一李應宿 二張書綸

三謝應元

四李彥青

羅江縣志卷十

邑人李調元雨村稿

節孝

宋節孝張氏羅江士人女其母楊氏寡居一日親黨有婚會母女偕往其典庫雍乙者從行既就坐乙先歸會罷楊氏歸則乙死于庫莫知殺者主名提點成都府路刑獄張文饒疑楊有私懼爲人知殺乙以滅口遂命石泉軍吏劾治楊言與女同楊實無他遂逮其女考掠無實吏乃掘地爲坑縛母于其內旁列熾火閉以水沃之絕而復蘇者屢辭終不服一日女謂獄吏曰我不勝苦

羅江縣志

卷十

一

毒將死矣願一見母而絕吏憐而許之既見謂母曰母以清潔聞奈何受此污辱寧死筆楚不可自誣女今死死將訟寃于天言終而絕於是石泉連三日地大震有聲如雷天雨雪屋瓦皆落邦人震恐勘官李志寧疑其獄夕具衣冠禱于天俄假寢坐廳事恍有猿墜前驚寤呼吏卒索之不見志寧自念夢兆非殺人袁姓乎有門卒忽言張氏饋食之夫曰袁氏明日袁至使吏執之曰殺人汝也袁色動遽曰吾憐之久矣願就死問之云適盜庫金會雍歸遽殺之楊乃得免時女死才數日也獄上郡牌其所居曰孝感坊

宋史

道釋

羅江縣道士譙又俊壯年忽夢太山府君追之賜以黃  
敕補爲杖直晝歸陽間夜赴冥府此二十餘年常說人  
間有命未終爲惡者追生魂笞之其人在陽間之病或  
貧乞是也往見親戚及里人被笞者明且往視之皆驗  
然恒願得免忽于冥間遇道士不言姓名謂曰爾何不  
致名者盡于陽間上告南辰北極必得免又俊依此度  
告忽爾太山府君却追黃敕自是遂免因入道攻易年  
八十餘 太平廣記

技術

羅江縣志

卷十

二

羅義綿州之南村人父兆鰲卽吾外公也生三子長超  
次玳三卽義也超玳皆慤謹獨義不治生產任狹仗義  
好奇術每爲人報不平二兄皆惡之幼時有老喇嘛至  
門求食義怒其臃腫逐之不應以石擊其額流血滿面  
喇嘛遂卧地號冤作死狀義悔扶至家厚待飲食爲謝  
前罪喇嘛曰無妨也速以水來義以杯覓水與之喇嘛  
咒水而自塗其痕頭皮如故義神其術出斗米求之遂  
密授其訣謂義曰此鐵牛水也以濟人則可不可以自  
利自利則不得其死也遂去鄉里有患跌折金傷者醫  
之無不立驗瘍瘡癰腫並能治之吾母吳太夫人患乳

巖火赤燉痛飲食不進延義咒水噴孔便不知癩以佩  
刀割其腐肉遂愈又善金石變化之術以小石置杯中  
蒙以帕咒之卽成小銀錠先君石亭公庚午年授徒觀  
音寺寺前有陳五店共試其術始見滿杯皆石去帕則  
皆銀也陳五以爲真盡納之懷中探之則又成石矣義  
笑曰此未爲奇也櫃筒有青蚨經我一搖則盡入吾袋  
陳五不信先出筒紀數復入始搖方聞響而筒空矣陳  
五甚急義出其袋笑曰錢在此也數之毫釐不爽先君  
奇之因延與飲嘆食無魚義曰可得也以紙醮水成二  
團投礎中則雙鯉碗在水中鱗鬣游漾似新出水者皆

羅江縣志

卷十

三

曰烹乎義曰不中烹也傾之於地仍成紙團爲之術然  
一日先君殺雞食義見曰何故殺生也以手逗其頸接  
之咒畢雞復飛去其神異如此然義自有此術不畏刀  
棍頗多持刃以爲能非數十人不可近或見斫傷卽以  
水自咒平復如故前後傷人無數兩兄患之義曰我終  
不以一人累兄也然旣嫌我我豈爲周處貽害鄉里乎  
遂去不知所往癸酉先君宰浙之餘姚令余奉母買舟  
由涪開程一日至重慶上岸登酒樓則義在焉問余曰  
汝來時曾聞州中有人殺七刀尙活乎余曰不知也後  
至酆都復見之並給予費別曰君去余亦歸矣後余官

京師聞義殺人前案發為孫法祖所獲以印鉗其足夾之幾斃置鐵牢中者屢年先是縣有甲首黃某者素見信於孫多剝民膏脂以邀官寵鄉人呼為黃虎義之殺人而遁也經一年事已息矣黃知其歸密為孫耳又暗為捕目故獲義以故恨黃刺骨逾年孫去赦出義百計覓黃黃巧避之終不敢出己丑余自京丁父艱歸見義於花街鎮蓋新移來此以舅故登堂拜之見精神如昔而腳稍蹙問其故目光炯炯似大不平者後戊戌余服闕補官提學廣東鄉人有來署所者告余曰義以去年二月殺黃某於團堆之劇場屠割無全膚其殺黃畢亦羅江縣志

卷十

四

自殺余聞之始嘆喇嘛之言至此終驗也

贊曰怨毒之於人甚矣哉黃與義本無夙昔之仇徒以身充甲首橫行鄉里助官虐民遂至身遭慘死可不鑒乎殺一人而除一方之害義亦烈男子也哉

二產

桃花犬 淳化合州貢羅江桃花犬甚小而性慧常馴擾于御榻之前每坐朝犬必掉尾先吠人乃肅然太宗不豫犬不食及上仙犬號呼涕泗以至疲瘠章聖初卽位左右引令前導鳴吠徘徊意若不忍章聖令諭以奉陵卽搖尾飲食如故造大鐵籠施素衲置鹵簿中行路

見者隕涕後因以斃詔以儆蓋基于熙陵之側

楊大年談苑淳化中合州貢羅江犬常循于御榻前太宗不豫犬不食及上僊號呼涕泗以至疲瘠見者隕涕參政李至作桃花犬歌以寄史館錢若水

方輿勝覽

翰林學士李至

字言幾真定人舉進士太平興國中為翰林學士參知政事兼秘書監判

國子監真宗朝拜工部尚書知河南府卒

作桃花犬歌呈修史郎錢侍郎

宋史錢若水傳太宗畜犬甚馴常在乘輿左右及崩號鳴不食因送永熙陵李至嘗咏其事欲若水書之以戒浮俗詩曰宮中有犬桃花名絳繪圍頸懸金鈴若水不從

先皇為愛馴且異指顧之間知上意珠簾未捲扇未開桃花搖尾常先至夜靜不離香砌眠朝飢抵傍御

羅江縣志

卷十

五

牀餽彩雲路熟不勞牽瑤草風微有時吠無何軒后鑄鼎成忽遺弓劍棄寰瀛迢迢松闕伊川上遠逐龍輶十數程兩眸漣漣似流淚骨見寒毛頓顛顛萬人見者俱傷心微物感恩猶若是韓盧備獵猶足嘉西旅充庭豈為瑞聞君奉詔修實錄一字為褒應不曲白魚赤雁且勿書願君書此懲浮俗

古今詩話

宋王禹偁園林犬賦嘉彼御犬既良且馴蒙先朝之乃眷向皇宮而託身有警蹕以皆從無起居而不親繡組飾以煒煒金鈴奮而振振飼以公庖彭澤之魚公會何足道畜之土性西旅之葵兮詎得同倫健隨



天步慵眠地茵效珍比夫異獸供命等乎邇臣若乃  
風暖掖庭花繁禁禦扇俟錦翼之雉籠近雪衣之女  
入赭袍兮曳尾聞霓裳兮率舞巡繞乎金塘徘徊乎  
瑤圃睥睨爐烟追隨蠟炬見觀書于乙夜聽求衣于  
未曙既無吠乎投籤每風興于曉鼓莫不默識聖心  
潛知天語備指顧以弗迷奉周旋而見撫第長遊而  
夕嬉又安在乎逐麋而捕鼠彼宋狔之與韓獪又安  
得同羣而接武者哉嗟乎事變人天時移今古秦皇  
採藥島中之士未迴軒后鍊丹湖上之龍已去欠舐  
鼎以登仙對遺弓而戀主卧錦薦兮罔安啗鮮食兮

羅江縣志

卷十

六

彌苦豐顧載減負重鋤而不勝病骨其羸求做蓋于  
何所赫赫顧命明明嗣皇念犬馬之微誠義存始卒  
徵父母之所愛深增畫傷俾守園陵之地且殊槃瓠  
之鄉縻索緙以璀璨珠籠檻而熒煌仗陪鹵簿車逐  
輶輶鑱幽宮兮黯黯號白日兮茫茫松阡夜月栢械  
曉霜依六尺之輿已成疇昔盜一杯之土亦足隄防  
表中天之巨痛甘朽骨於龍岡狡兔盡而見烹理殊  
炎漢駿馬死而陪葬事類皇唐邈予生之介立荷太  
宗之維繫叨澤宮之一第玷承明而三入耻懷祿以  
不言維報君之是急胡薄命之多屯顧寸功而莫集

嗟白首于郎署慟梓宮而嗚咽生未得圖形烟閣想  
英衛之難追死不當賜塋長陵豈蕭曹之能揖異臣  
哉之可歌信龍也之罔及聊作賦以自傷寄毫端而

雪泣小畜集

慶歷中衛士有變震驚宮掖臺官宋禧上言蜀有羅江  
狗赤而尾小者其警如神願養此狗於掖庭以警倉卒  
時人謂之宋羅江東軒筆錄

馬馳李 李出馬馳寺樹高七八尺葉微小結實生熟  
皆青灰色核小如米而甘脆一名青脆李

石瓜樹在馬馳寺正殿東廊堦下土人呼爲冬瓜樹樹

羅江縣志

卷十

七

端挺葉肥大如冬青花似桑色淺黃實長不圓殼解而  
子見見益部方物畧記又廣羣芳譜烏撒軍民府土產  
石瓜樹生堅如石善治心痛今羅江縣有之


海紅豆紅豆出畧平小天台山遍地有之枝如木蓮葉  
碧綠三月開花結莢莢內有豆如紅豆可作餠果春取  
根下小枝移栽易活

附銅爵二

羅江縣北寺周士泰家中掘出明銅爵二高五寸上濶  
五寸腹二寸脚二寸半以其亦係羅江縣土中掘出故  
附記之使後人知有羅江縣故也

明銅爵二

面




羅江縣志

卷十

八

背



調元銅爵詩并序云潺亭山下有八十歲老人周士  
泰掘出明兩銅爵上有成化十八年羅江縣置九字  
予購得之並紀以詩云人間何處是滄桑生把他邦  
換此邦丁鶴歸來城郭變兩銅爵上見羅江

附刪誤舊志一條

按舊志西山觀設有羅隱木牌不知始於何人蓋羅隱曾有魏城逢故人詩疑其亦遊于羅故祀之又因查不出措紳以羅江爲雒城始於何代遂引羅江東集中有雒城作一首其詩云大鹵旌旗出洛濱此中烟月似埃塵更無樓閣尋行處只有山川識舊人早得鑄金誇范蠡旋聞垂釣哭平津舊遊難得時難遇迴首空城百草春觀其詞意蓋客寓洛陽作也古洛雒通用故曰洛濱與羅江葢爾小縣全不相合且此時五代分爭十國各霸前後

羅江縣志

卷十

十

兩蜀爲王孟所據吳越王獨守正朔終身稱王故江東暫依之何曾有腳跡入蜀中來祀羅人殆如楊公周冕欲修金雁橋而先與漢州爭雒城也善乎劉甲人物志序曰唐以前凡稱涪城卽今綿州也凡稱雒城卽今漢州也如使雒城爲羅江則朱子綱目於建安十七年冬十二月大書曰劉備進據涪城不應又于十八年夏五月復書曰進圍雒城矣羅江去雒城七十里安知非中流矢後歸葬於此乎羅江爲涪分邑之地當時不過村鎮驛站往來之所並未立有主名自改設羅江縣後遂無

古名可稱搢紳出于京都琉璃廠書賈多係妄爲全不足據遂強安雒城二字以至仕宦者俱遵用之此誤之又誤者也故不可不刪又大靈山乃羅瓚隱居之所今人多誤爲羅公遠則又走入唐明皇月宮去矣然仙家事本屬荒誕可以不辨至此事則讀書人明而易見者也不得不全刪之以免貽誤後人冒認雒城爲羅江之號而並不引羅江東詩人以爲我羅江光寵也然則羅江古名當何稱乎曰潺亭萬安皆可稱也何必區區與漢州爭雒城也調元又記

雒城與羅江全不相涉不知何以相沿誤稱至此羅隱木牌想亦起於沈公修志時附會其說今得吾師辨明刪除之閱者可以昭然發矇矣  
受業冉玉嘉跋